

81

T 9117/2143

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
DEC 11 1937

續
通
合
編

蠻司合誌

西河合集

蠻司合誌

卷一

湖廣

卷二


貴州一

卷三

貴州二

卷四

四川一



卷五

四川二

卷六

四川三

卷七

四川四

卷八

雲南一

卷九

雲南二

卷十

雲南三

卷十一

雲南四

卷十二

兩廣一

卷十三

兩廣二

卷十四

兩廣三

卷十五

兩廣四

西河合集

蕭山毛奇齡

原名牲字僧開稿

張希良石虹較陳元龍廣陵

蠻司合誌

蠻司者土司也自古無土司之名有虞氏征三苗高宗伐鬼方漢武檄馮冉邛夔統謂之蠻禹貢曰三百里蠻詩曰用邊蠻方皆是也其地踞湖貴川雲兩廣六省自巴夔上下迤及海嶠數萬里溪峒箐篁之中曰狃曰伶曰獠曰猺曰獞凡數十種歷代迄今各有大姓為領袖如北魏之冉氏田氏向氏南宋之舒氏

彭氏蘇氏楊氏皆雄長其地呼喚羣族特未嘗建設州司隸之銓選如所稱土官土吏者惟有明鍾元舊事悉加建設其法倣之蜀漢昭烈授羅伽李恢爲郡功曹主簿晉帝用興古爨深作本郡太守宋太祖舉獯人秦冉雄使之自治辰州而推廣其意乃遍設官吏盡布籍屬于是土司之名興焉彼其大姓相嬗世積威約雖同爲編土而主隸之分定之已久我因其已定之分而假以予奪初不過借朝廷之名器用相羈縻而等威所至折箠惟命所謂以虛名收實利者強狄之縶維生駒之羈勒如此而已然而以蠻治蠻

卽以蠻攻蠻儻溪峒之間竊發時起則彼我徵調頗易爲力因之設土兵相制之法而其後展轉假借凡議大征者無不藉狼兵土兵遠爲驅遣雖周武伐紂亦嘗以羗髡彭濮諸蠻同會毋野而究之控馭無方利害各半故王文成議勦賊不用狼土而武功成焉按有明洪武初年凡西南夷來歸者卽用原官授之而稽其土官土兵及賦稅差役駐防守禦之制但定銓選不立徵調其定銓選法凡土官名號曰宣慰司曰招討司曰安撫司曰長官司初皆隸吏部驗封而後以土兵相制半隸武選每襲替則必奉朝命其無

子弟者即妻女皆得襲替雖數年之後萬里之遙亦必赴闕受職迨天順末詔許土官繳呈勘奏即與襲替於是控制稍疎動多自恣至成化中又有納穀備賑急公補授之令則規取日陋離畔日生雖孝宗發憤釐革而正德以還陋習未除暨嘉靖九年始毅然復祖宗之舊令該府州縣正二經歷巡檢驛傳三百六十隸驗封宣慰宣撫招討安撫長官一百三十三隸武選其隸驗封者布政司領之隸武選者都指揮使司領之文武相維機權攸寓細大相關股掌易運蓋蠻實難馭獷悍桀驁其性猜忌讎殺其習烙躡善

走枵腹善鬪其力耽戀窟穴不忍違離假重爵命威制服屬其勢知其性與習則不宜喜功生事而知其勢與力則勢可以為我用而力不可以使之自用故自洪武暨崇禎一十六朝二百七十餘年之間凡沿革向背大征大役或得或失稍見史乘者略輯其大凡彙為一編名曰合誌考古者覽焉

湖廣

湖廣土司踞湖南巫黔中地內錯辰常外連川貴溪峒深冥往往為寇元末尤甚偽漢陳友諒竊據湖湘間每招引諸苗長官以畧肉肘帛啖之立應本寨不

足卽取之。傍寨破城陷陣所向無敵。時高皇帝卽吳王位。大敗友諒於鄱陽。諸苗大恐。跳岸走。是年湖廣安定。宣撫使向思明等遣其溪洞長官硬徹律以故元所授宣撫敕及印章來獻。請改置官司。命仍置安定等處宣撫司。設宣撫使二。以思明及其弟思勝居之。遂置懷德軍民宣撫司。以所附向大旺什用爲宣撫使。南木什用、潘仲玉爲統軍。元帥沒葉什用、硬徹律爲抽攔。不夜、黃石三長官司。而慈利土官覃屋亦以故元所授叅政照會三道來獻。卽置慈利軍民宣撫司。以屋爲宣撫使。屋貢馬二十四匹。會吳元。年左相。

國徐達按視湖湘。以楊璟爲叅政。令之招撫。而別遣指揮使王遇成等攻討諸苗之未服者。乃隨服。隨叛。遂命江夏侯周德興、東川侯吳海、普定侯陳桓、靖寧侯葉昇、遍平蠻寨。大破黔辰、九溪、施南、散毛、鎮南、大旺諸洞。于是改保靖安撫爲保靖宣慰。以土官彭萬里爲宣慰使。改永順宣撫爲永順軍民安撫。以土官彭添保爲同知總兵官。一時瀏陽黃寧、茶鄉譚悅道、湘陰吳仁琮、劉玉容、美洞田光寶、思沅兩界黃元明、桑直、荒溪諸洞墨色什用各以來歸附。竝授官去。當是時田州岑氏、龍州趙氏、播州楊氏、貴州安氏其雜。

處兩廣川雲諸大姓畏威懷德以次服屬有明三百
年撫有西南諸土司實自此始大抵苗種自長沙沅
辰以南與氏羗混雜其人蟻聚螽集有村寨而無城
市隸官者曰熟苗否曰生苗魃結跼躡荆棘若猿
狖班衣無衿衿納首以竅而挿雞毛於其顛負蘭抱
弩童時稱馬郎銜環耳間婦女襍被以海肥銅鈴藥
珠如纓絡然行歌誘馬郎而教之淫至仲春合婚則
大集馬郎出室女襍吹愁笛壺笙擊長腰鼓跳舞月
前名曰跳月老人騎木馬酌酒聽馬郎擇女負去自
爲婚然後估女貌而責以婚儀有貌美儀多不能償

者歲責之雖白首不小貲謂之癩虫飲食蓄惡草以
蕎灰和秫糜釀爲敗瀝襍投諸魚肉蠅蚤營營名之
曰醋俗以醋之寡多驗家之豐嗇嘗曰是家多醋槽
不貧每遇歲時名親串撾銅鼓鬪牛而封其負者乃
截牛角藏于家雖子孫數世猶必持牛角示人以爲
雄焉要約無文書刻木爲契爭訟則推一人斷曲直
曰行頭曲者絀以等計所絀等多則擲等三曰天減
一地減一行頭又減一然後責贖其餘者言語侏儻
非重譯莫解呼其曹曰同年呼其酋曰茫呼人曰歹
自呼亦曰歹猶吳人呼儂然性猜忌好讎殺操戈羣

行報復不已。諺有曰：母讎苗。音彌，尤切。世不休，顧嗜利絕。禮讓廉耻，擲片肉于地，爭趣若犬，承歡而相親，稍拂即磨齒相向。世嘗為之語曰：喜人怒禽。人禽，生不識。年月以鼠馬記子午，每歲首諸苗慶賀，擇冬三月朔，各尚其一。曰：開年俗信鬼祀竹王祠及磨嵯神廟時，時治蠱，設蠱神，合毒藥，傅弩矢中之血，濡縷殺人。其在金筑者為克孟牯羊，二苗在獨山者為九名九姓。苗在平樂為紫薑苗，在白納者為賣爺苗，在葛彰葛商為短裙苗，在陳蒙爛土為黑苗，又為天苗。凡數千里內相繼歸附，其為種不一，而風俗略等。國初設宣

慰司二。曰：末順曰保靖，其在末順者有南渭施溪上。溪三州土官在保靖者有陰隆杜望滑石三巡檢司。土官俱隸布政司，其既也以三州隸都司，而保靖所轄長官祇五寨田氏。因元世襲至末樂初，指揮龔能始招來，算子坪等處三十五寨，生苗廖彪等四百五十三戶，乃設算子坪長官，同隸保靖。以彪為長官，而別設答意治古二寨長官，隸貴州宣慰。安置生苗各野龍答哥等，凡舊置施南衛軍民指揮使司有故元世官不能襲者，重設施南散毛諸長官分隸安撫。令覃田黃向諸大姓各有所屬。于是設宣撫四，先置忠

建容美而復以施南散毛陞為宣撫設安撫八曰東鄉五路曰忠路曰忠孝曰金峒曰龍潭曰大旺曰思峒曰高羅設長官十九以臘惹洞麥著黃洞驢運洞施溶溪白崖洞田家洞六長官隸未順以五寨箐子坪二長官隸保靖以搖把洞上愛茶洞下愛茶洞劍南木柵鎮南唐崖七長官分隸施南散毛忠建其餘四長官曰椒山瑪瑙曰五峰石寶曰石梁下峒曰水盡源通塔平則專隸容美蠻夷五長官曰鎮遠曰隆奉曰西泮曰東流曰臘壁洞則分隸東鄉五路及金峒大旺之間至宣德二年增設石關洞長官隸之金

峒而其餘如故

大蟲可宜者保靖宣慰使也與彭藥哈婢同管司事爭淫土吏婦雞腰殺彭藥哈婢而自死于法其孫彭惠為土舍據西江口地恨祖死革職無所襲而彭藥哈婢孫九霄得襲祖職為宣慰使忌之目為讎正德中叅政奉檄清宣慰司地則惠所據西江口實宣慰地也遂奪西江口七寨還宣慰使九霄而于是讎愈甚會未順宣慰使彭明輔與惠婚姻惠假明輔兵大起讎殺鎮巡官屢檄不止前後訐奏凡八十餘上時多不直惠值明輔娶惠女為子婦鼓吹迎于途惠結

綵繒爲鵝籠坐其中送之鎮巡官勾惠出惠鵝籠中縛之內於獄明輔怒率男婦百人攻獄奪惠去既而官兵討明輔明輔請還惠仍繫獄上乃遣都御史吳廷舉會鎮巡官雜治之獄成謂惠當坐誅第夷情難盡法因徙惠辰州特設大刺巡檢司一使流官主之而惠爲流土舍協司事令聽調贖罪焉

沅州麻陽苗以迎龍神釀錢相殺沅州衛百戶陳恩詢之忽殺恩苗自知有罪推二花頭爲主擁衆奔貴州會貴州白苗許龍保與吳黑苗合爲寇出略保靖間附之嘉靖二十六年兩廣總督侍郎張岳奉命勦

諸苗甫進兵值苗陷印江寇石阡府教授毛淵統民兵嬰城而叅將石邦憲勇敢能殺賊大破諸苗擒斬千餘人許保恐聚母妻子女變所衣詐爲湖商婦令麻陽苗以絲繩束之關舉行過侯村餒甚攫村人漿飯曰我苗也村人報邦憲邦憲追及之殺諸苗而鹵其所關舉者惟許保與黑苗跳不獲二花頭還湖密結湖苗田應朝等爲應援而身與許保入思州詐稱瞿塘卒番戍入城執知府李允簡去邦憲知其情乃復提兵邀賊歸驟擊之奪允簡還殺二花頭而許保仍遁岳乃購降苗麻得盤吳老律等偵許保所在則

許保方匿靈溪洞中裸而居翼日變衣過苗家弔喪
 岳乃伏于路擒俘之而遣土目斬黑苗于別洞中燻
 其頭以獻并捕殺湖苗之陰附者田應朝等賊平
 萬縣黃俊者本湖苗于嘉靖三十三年入龍潭安撫
 司踞支羅山洞與其子黃中白晝殺人捕繫之會白
 草番反中乃為父上書請從征白草番立功而自乞
 為副許之及從征則附反者副使熊達等復以計擒
 俊夷死獄中而中以漏網仍歸舊巢築牛欄坪寨守
 之號天城自稱天城王流劫奉節雲陽間四十四年
 川湖兵夾勦中力竭復降梟市中

劉堂良岔處諸寨苗也其寨二百餘故辰沅所部旁
 近桂林貴筑盤亘八百里阻山為寇萬曆中上遣將
 提兵勦之不伏先是叅政項思教與叅議龍宗武等
 每以恩相結為撫綏計諸寨動心至是湖撫李江貴
 撫劉庠一意請撫檄叅將鄧龍等大會辰沅下招徠
 之令久之劉堂良率苗萬人束于而縛詣軍門請降
 且言願歸土六百里得附編氓末生死唯命乃遣指
 揮一人屯天柱所專以撫苗為務每寨立寨長一人
 或三四寨或八九寨則立團長一人凡歲九月即封
 輸賦稅以金入靖州庫而以餉入天柱倉屬兵備按

驗三年無過舉則用鼓吹花幣賞賚如令兵部尚書張學顏上其議可之上乃賜李江劉庠銀三十兩表裏各二項思教等銀十五兩叅將鄧龍守備周弘謨千戶陳文魁騰霄百戶郝文煥等銀八兩有差草坪苗石纂祿奪天星寨苗兵總滿勝等而殺吳順和逐寨民三十餘家其明年天星吳什傳天文糾龍集塞苗胡才殺草坪苗龍顯等以報之而石纂祿復殺龍集寨苗吳天保等十餘人謂其助天星也于是讎不已萬曆中黎靖叅將黃斌移之撫諭使邵陞及御史甘士价分守郭棐兵巡金德輝問狀乃遣邏司

方承蛟詣草坪天星逮兩家苗不至復遣吏目吳廷季往又不至於是敕百戶黃鐘音文獻朝就問鐘音卽請兵與俱許之翼日赴草坪至月團坡銃鳴諸苗恐遣婦女出觀值風急旌旂聲獵獵婦女反走各闔其外戶不敢出旣而偵者謂官兵少易與乃皆擐甲貫弓矢迎鐘音馬前鐘音叱之曰爾輩欲反耶石纂祿殺吳順保不過輸銀五百兩貴其死乃不奉呼喚故我承敕來就問祇欲出篡祿一對簿耳此與爾輩亦何與而爾輩無狀敢拒我何也言畢趣獻朝下坡而自策馬先軍行至瀾泥所有楊慶和者與石曹楊

道總揮衆前謂官兵馳我無却理且五百銀誰輸者不如乘其少攻之衆曰善遂擁衆向鍾音刺其喉并殺兵王明等三十六人守巡二副使急率靖州守鄭雲鎬辰州判官祝養蒙未從令孫夢熊五開指揮戚元勳並提兵至草坪必擒滅乃已于是諸苗始大恐請出石纂祿楊慶和等而自願輸賦贖罪會分守副使先以他事遣使石惟忠奉火牌至團屯屯長石纂寬倚之句其轉請時苗衆皆聚謀集惟忠所惟忠稍示以利害衆懼然目視天漢豎手捧其耳忽散去少頃老少負戴運草食確磴入箐篁中有以牛驢運者

見漢使不顧漢使問之亦不答婦女跣足走有嬌好者騎人項以趨移時屯寨爲空乃膠致楊道總石看才等至守巡所而餘苗閉山箐不出守備吳時喬請之守巡二副使將還師值特洞龍集諸寨讎草坪亦援兵來會願効力先驅必斬其渠魁乃已于是守巡二副使檄廣西六甲苗千人助之遂大破草坪生得楊慶和及田能老王等斬首數十級餘苗悉定湖貴撫諭使上書請襲黃鐘音子男而賚副使及府縣官守備千百戶等議以辰沅諸苗屬之未順保靖二宣慰如嘉靖故事制曰可

西河合集

蕭山毛奇齡

字僧開又字于稿

陸震文端較

蠻司合誌

貴州

貴州古羅施鬼國自蜀漢火濟從諸葛亮討孟獲有功封羅甸國王嗣後唐阿珮宋普貴元阿畫世居水西有爵土洪武初阿畫子靄翠與蒙古反又名宋欽者皆以元宣慰使獻地歸附太祖嘉之使仍為宣慰而普定女總管適爾及其弟阿甕亦以來朝授適爾

女知府賜以錦綺。當是時，已開貴州，設貴州長官司。命都指揮顧成指揮馬華鎮守之。築城建石門五將，以立州縣而未逮也。既而思南宣慰使田仁智思州宣撫使田仁厚爭先納款獻鎮遠古州軍民二府及婺川功水常寧等十縣，龍泉瑞溪沿河等三十四州地，卽以其地隸雲南管轄，而以靄翠所守地隸之。四川翠復請開隴居犵狁以拓已境，不許。于是成乃討新添諸寨，闢草萊，使征南官軍得以取道，而指揮張岱平谷峽，刺向關破的敖寨，同知吳汝平江方江松殺播桶破下沙木洞，信國公湯和江夏侯周德興從

楚王楨討思州諸亂，寇破上王洞，殺吳而兒俘四萬餘衆，且與江陰侯吳良平潭溪古州二百二十三洞，藉其民一萬五千人。都督楊文同知韓觀勦古州洞蠻林寬，俘其衆三十，而顧成又復勦平平洲六洞，嶗嶸天柱天堂大坪小坪諸寇，凡一百三十七寨。會文皇卽位，思州宣慰田琛與思南宣慰田宗鼎構怨相殺，而副使黃禧佐琛攻宗鼎，宗鼎走琛，殺宗鼎弟，發其祖墳墓而戮其母屍。時顧成封鎮遠侯，以兵五萬討之，執琛與禧，而琛妻冉榮復招誘臺羅抗命。上乃囚琛，禧思赦宗鼎，而宗鼎倔强且自愬，祖母阿

施會名禧與姦造禍本殺已祖母亦許宗鼎殺親母
 竄亂妻女乃合治宗鼎琛重罪使子襲而琛母楊氏
 宗鼎妻冉氏皆前後赴闕朝貢乃以思州思南三十
 九長官司改設思州思南鎮遠黎平石阡銅仁六府
 并普安永寧鎮寧安順四州陞貴州為省而以布政
 司領宣慰司一曰貴州領安撫司一曰金筑領長官
 司五十二曰貴竹水東青山劄佐龍里白納底寨養
 龍坑上馬坑小程番盧番程番草番方番洪番臥龍
 番金石番小龍番大龍番羅番盧山水德江蠻夷思
 印江沿河祐溪偏橋石阡苗民葛彰葛商龍泉坪銅

仁省溪提溪大萬山烏羅平頭著可慕後頂營十二
 營康佐寧谷寨西堡木瓜麻嚮大華都勻那水平浪
 平洲六洞九名九姓獨山州合江洲陳蒙爛土豐寧
 領蠻夷長官司二十曰中曹乖西都坪峨異溪都素
 朗溪鎮遠金容金達印水十五洞潭溪八舟洪州泊
 里曹滴洞古州西山陽洞湖耳亮寨歐陽新化中林
 驗洞赤溪滴洞龍里都司所領長官司十二曰新添
 小平伐把平寨丹平丹行楊義麻哈樂平平伐大平
 伐清平平定其布政司官屬俱用流官獨府官以下
 叅用土官十五人鎮遠府同知一通判一推官一司

獄一安順州同知一普安州判官一婺州縣知縣一
 縣丞一曹沙渡瓮城河盤江谷龍的成河單韓偏刀
 水都儒五堡三坑巡檢七其後隆慶中改貴州宣慰
 司為貴陽府普市守禦千戶所為凱里安撫司而增
 樂平平定二長官司于都勻府蓋蠻種不一有狔獍
 狔狔木狔狔獍諸名皆剛悍嗜殺外慙而內黠信巫
 屏醫人死則曰鬼棄之矣不哭至明年杜宇鳴然後
 號咷而思之以丑寅卯三日貿易曰牛場虎場兔場
 每把忌必杜門不出越若干日而後已犯者不吉其
 居水西曰烏蠻為烏羅羅居慕役曰白蠻為白羅羅

深目長身荷氊而戴笠束以葦索左肩肩羊皮佩長
 刀箭箠多力為諸苗冠諺曰水西羅鬼斷頭掉尾言
 至死猶健也為人戀主故安氏四十八部世長其上
 無所忤男女皆跣足棄絕禮教父兄弟死則收其後
 母而妻其妻新婦見舅姑不拜裸而進盟曰奉堂白
 蠻稍貪食鼠雀螽蟻躐若蕪女子擇善淫者而娶
 之其名狔狔者蓬頭赤腳輕死好鬪殺腰繫桶裙以
 布為之花布為花狔狔紅布為紅狔狔在平伐者為
 打牙狔狔在新添者為剪頭狔狔又有猪屎狔狔不
 潔臥猪欄中別有狔狔有狔狔一曰楊黃好鞦韆善

淫其名狎家者頗類中土嘗樓居飾婦以長裙細績而覆以青衣髻髻蒙單縠若冒絮然未嫁者襍奔不禁嫁即否家家擊銅鼓為樂有宋家蔡家相傳春秋時楚子俘宋蔡二國人而放之南疆遂為夷而虜家為駝後冉家為笊後冉有砂坑土人嘗採砂若磬謂之砂床良者比箭簇設戍守之而因以為利別有尾灑家尾灑者水下也人死以杵叩椎塘而歌椎塘者白也至若龍家則俗類狎家而衣尚曰遇喪服則易之以青然有所謂小頭龍家大頭龍家狗耳龍家者大略諸蠻尚淫多女子為政其襲替多女土官異于

他族如建昌知府師克武定知府商勝東川知府勝古烏撒知府實卜皆洪武中女土官也當其時在水西有奢香

奢香霽翠妻霽翠與蒙古互同歸附而蒙古互死其妻劉贖珠襲宣慰使朝貢賜錦綺霽翠美之于其再朝則遣妻奢香隨贖珠後率土酋十五人貢方物馬匹太祖大悅襍賜文綺織錦珠翠如意冠金環繡衣遂于霽翠之死奢香亦得循例赴闕襲宣慰使顧香虔事上而傲于待物既襲頗自大都督何福討羅羅還奏香桀驁不用命當竝致討不報而香感上意于

其年冬急遣子婦奢助率把事頭目允則隴罔入貢。則賞賚尤厚。時都指揮馬華者開普定驛傳役以官兵將盡驅諸羅爲郡縣地而苦無其間。會香爲他羅所訐。華故惡香。傲至是欲辱香。激諸羅怒。然後俟其反而加之以兵。乃驟檄香至。責簿香不勝叱壯士裸香。笞其臀。香怒甚。斷所佩革帶誓必報。而四十八部羅咸集香軍門。憂顙願掃境。反香曰。反非吾分。且反則人得借天兵以臨我中。反計矣。我之殺反者有在也。謀之贖珠。贖珠曰。盍見上。愬之乎。曰。愬則何以殺之。贖珠曰。夫上之所以重華者。以其能開郵驛。恢邊

境耳。今四川道極曾未通達。我能助蠻兵爲上。開思南鎮遠隴聳羊腸諸道。以達邛蜀上方。倚我之不暇。何惜此區區。啟邊釁者。香曰。然遽邀贖珠行。而已與奢助率各部把事隨之入貢。具言華激變及諸羅欲反狀。願効力開西鄙。世世保境。以乞除此害。上且驚且喜。曰。吾固知此奴妄。果然。微若言。幾敗乃事矣。乃責香開道而中華。以事殺華。香遂開偏橋水東。以達烏蒙烏撒及容山草塘諸境。且立龍場九驛。歲歲供馬匹廩積。以通往來。而西南益闢。宣德二年。水西宣慰頭目阿閉妨宜與普定衛西堡

長官蠻民阿骨阿哈共爲亂。貴州總兵官蕭授上書請討。上不許。敕遣官撫諭。而羣苗大起。有底寨干炒。豐寧羅父蕩谷。旺甲農甲。怒平若阿夜谷。把革子裸。普安州裸革。治古答意石。各野銅仁平頭。著可瓮橋。石雞娘。尊子坪。吳畢郎等。各聚衆相應。初朝議主撫。謂蠻夷僻遠。不宜與爭。第寬以撫之。使之自來。因盡蠲其戶丁銀糧諸賦。稅而負固愈甚。遂至治古答意。新郎諸寨。殘苗吳不兒等。結生苗龍不登。糾合下高。大刀蠻民。劫略城郭。殺軍民。燒公私廬舍。不得已。乃始調湖廣四川諸官軍。及各長官土兵。以總兵官蕭

授及三司御史統之。且撫且勦。而其患稍息。其旣也。新添衛丹行長官故土官子羅朝扇與逃民羅阿記等。復蠢蠢動會。指揮僉事李政鎮撫。有方爲蠻民所信。而以他事被逮去。至是復政官俾守之。其餘都勻衛陳蒙爛土諸苗。韋翁同等。有未靖者。議調廣西泗城州土兵千人立堡鎮其地。至正統中。兵部尚書王驥征麓川。悉調貴州兵以行。而貴州空虛。久之。諸苗反。驥還討擒。曾韋富撓等。獻俘而驥以老病告歸。使侯璉代之。璉駐師雲南。相去遠。保定伯梁瑤自湖廣奉命入貴州。未至。其當推貴撫無敢往者。獨修撰王

恂慨然請行行則平越新添畢節龍里諸衛已圍困
久兵少不敢近景泰元年吏部侍郎何文淵上言貴
州總兵官生分激變已非一日今兵疲民困又當遣
將征南之際湖廣雲南四川三布政司轉運不給貴
州山高嶺峻本難設守而蠻人叛服不常乞救兵部
會多官議其被賊燒燬官舍勿再造暫將布按以下
及各府大小官吏并從征官軍一切撤回祇照洪武
年例設宣慰使司管屬土人設都司都指揮等官鈐
束軍衛而以大將鎮守之便時邊警方亟衆唯唯謂
文淵言是獨兵部尚書于謙執不可以爲太祖高皇

帝開創于前成祖文皇帝經營于後迄于今將百年
矣法制已定勢無可更比來以邊將處置乖方加以
征南之師數出遂致賊寇竊發勞師遠征然且一年
之間各該城池雖被圍困而官將死守未之稍變今
總督總兵叅將巡按三司等官初未嘗言此地可棄
也其請兵請餉亦未嘗言此地難與守也夫土地者
祖宗之土地人民者祖宗之人民萬一缺軼猶宜補
救今堂堂布按盡轄其地小有枝梧而動言棄擲日
蹙百里伊誰之咎文淵先曾奉使貴州備諳山川險
易夷情向背宜量從陞職給救以往令相度形勢便

宜行事。至賞賜銀幣，卽就彼官庫支給，不必京師運發。議定請旨。景泰帝是謙言，然不復差官。祇着侯璉、梁瑤整理進勦。時王驥尚候代未行，并敕協力。於是副總兵田禮進兵解平越，圍侯璉。調都指揮鄭儁及都盧等寨宣慰璉宜勦水西。梁瑤調雲南兵由烏撒會于畢節，調普安州土官隆本援安南衛。遂尅彌勒、安南等一十餘寨，降阿蒙等五寨。賊復圍平越，璉回兵擊却之。分哨七盤坡、羊腹河、楊老堡。解清平，圍仍哨清平。迤東至重安江，與王驥兵會。自是隆安至鎮遠道路皆通，而普定之圍未解。璉選雲南善射者爲

前鋒自將之至普定，疾戰矢下如雨。賊大敗，驅之時田禮等以兵來會，遂大破龍里、瓮橋及新添、平越、清平、都勻諸賊。貴州盡平。

成化十七年，貴州程番知府鄧廷瓚奏本府學校中有土人子弟在學者，宜分別處置以示獎勵。上曰：蠻夷嚮化，其意可嘉。旣已建置，生徒有同內地，則一體相視，原無分別。祇科舉文義未易猝辦。先應歲貢生員一人，俾觀光上國，相勸于學，以稱立賢無方之意。諸蠻大悅。旣而蠻性終未馴，廷瓚去諸苗稍稍叛，乃復起。廷瓚憂服加副都使提督軍務，鞫縻之。至弘治

初提學毛科以文試土生。倣廷瓚意多獎勵。會土官鐵氏負固其姻家。有毛氏土生入試科。優禮之。取高等。譬以大義。令諭鐵氏。使歸順。鐵氏大感。與毛氏相約。納賦稅入貢。而太監蔣琮謂科與蠻族通。姓利蠻。所有大不道。賴巡撫解免。其後蠻民亦稍稍有向學者。

普安州土判官隆暢有後妻曰米魯。負美色。嘗以忤暢。出居其父霑益州土知府安民家。暢前妻子禮因暢老奉朝命。替暢為判官。而聽營長阿保讒。父子間不相能。米魯覘知之。諷阿保使禮迎已。而先與阿保

通。阿保盛稱米魯。思禮狀。禮念魯色美且惡暢。竟迎魯。同室居。烝魯。且名阿保雜淫之。暢聞大怒。立殺禮。燬阿保寨。阿保乃挾魯統其子阿鮮。莫阿歹。見抗兵攻暢。破暢寨。百餘暢敗竄之。雲南時東寧伯焦俊為總兵官。與巡撫錢鉞。名阿保及暢。曲為調釋。而誓以官法。兩家各唯唯。于是暢臨訣。米魯出送暢。拜且泣。親掖暢上馬。枕暢股。啜啜。若不忍去。暢者遂陰中暢。毒暢路死。阿保與魯據寨反。會暢別有妾適烏生。二子曰。珀曰。瑤居安南。保魯欲并殺珀。瑤絕暢後事成。王諸蠻不成。猶得以女土官襲職。乃于安南城外築

阿先硬寨阿保與魯親守之而別築青黑猴場查刺
 三硬寨于普安州拖長江諸處令阿鮮莫阿歹兒互
 為防守更名所居寨為承天寨號無敵天王出入建
 黃燾御史張淳救捕之不克賊益橫鎮巡官以聞乃
 命發十衛官軍及諸長官司土兵萬三千餘人分道
 進兵且召安民責以匿賊狀使殺賊自贖民乃率土
 兵攻斬阿保父子于查刺寨米魯亡走久之焦俊奏
 言賊弄兵十年先後據夷寨百三十餘殺傷官軍人
 等無算而女戎擁黨尚匿土官安民家不法孰甚仍
 宜責民勦餘賊或獻牝白贖而安民承命陽為進勦

反陰資米魯蠻兵五百襲殺適烏及二子珀塔絕願
 望乃密遣營長福祐隨米魯顯據別寨大殺略且投
 牒鎮巡乞以女土官襲職巡撫錢鉞及副使周鳳都
 指揮劉英吳遠指揮任禮張英楊芳少監楊友總兵
 官焦俊皆受魯賄請宥魯聽襲朝議獨不可切責之
 必得魯乃已會貴州副使劉福自詭知兵衆倚之追
 勦而仍作移文取賊賂賊憤甚乃襲殺周鳳吳遠劉
 福等執楊友而指揮史韜閻鉦李雄郭仁李宗武等
 皆轉戰死上乃命南京兵部尚書王軾巡撫陳金都
 指揮李政等統官軍進勦奪楊友還破阿舊阿滿阿

黑阿維二十餘寨，斬寨首阿烏阿宗及福祐子阿魯。獠賊襪車生擒米朶阿舊、目波衣、江西賈人龍清、監生洪子華、而米魯、福祐、皆竄走。匿馬尾籠，無何大兵合圍之，乃擒米魯、福祐及祐妻。攝受妾適固子阿雜等，斬之。而下安民于獄。既而民自辨，赦民。正德元年，暢族土婦適擦，襲土判官職，親赴京朝賀，貢馬上甚嘉之。或曰：適擦亦暢妾。阿溪清平衛部苗猓，多猜，有養子阿刺，僥膂力能披甲三重，躍地而起，越三五丈。兩人謀勇相資，橫行諸苗間，假子母罔苗利，而誘他苗為倫兒，間劫旅商。

有官兵探捕者，反為之居間，邀重賂，否則捕遠苗之。不伏已者，強指為賊，鎮巡以下則負納歲幣以為之地。弘治中，巡撫孔鏞初到官，患之，詢之監軍總帥皆譽溪刺如一口鏞，大怒，親往清平訪部曲中最能者，得指揮王通。歷詢苗害，應如響，而獨不一。及溪刺鏞微探及之，通愕然。既而躡，嚙鏞，怒叱曰：汝謂我不能殺溪刺耶？雖然，吾能殺汝。按劍前逼，不得已，始道狀。且備言所以。夤緣要上官者，鏞詢得其人，一指揮王曾一總旗陳瑞，鏞立劫曾、瑞，欲殺之。令畫計擒溪刺，自贖。曾、瑞乃謝去。畫擒溪刺法曰：非鬪牛不可，俗鬪

牛以券多為勝必集大姓置草間鬪之乃陰令各若
 出兵伏牛傍而圍以大姓刻期應援遂往謁溪刺語
 鬪牛事溪刺喜欲行以雞卜不吉遲回間溪言吾夜
 夢魚罟張吾前如何二人曰張罟得魚此吉徵也牛
 必屬王矣溪刺益喜乃與二人刻木行至牛場相牛
 伏四起連矛進刺刺徒手傷百餘人竟就執并溪繫
 之膠車至鏞前鏞詢之溪垂首不語刺獨仰頭視鏞
 曰吾不畏千萬人獨畏一孔公然不知擒我若是易
 也溪刺死有子竄都勻檄往擒之悉殪焉其後有阿
 旁阿皆阿革於正德十一年據香爐山稱王遍攻興

隆偏頭平越新添龍貴諸鎮道路皆阻巡撫曹祥檄
 諸路兵進勦不克乃奏請總兵李昂及湖撫秦金會
 勦擒賊阿革阿義阿黎而香爐山險百攻不能下乃
 雜製繩梯及鐵猫爬山虎諸具督令宣慰彭九霄彭
 明輔等選精銳緣崖而上拔木柵縱火焚巢斬賊首
 阿傍等乘勝勦黑苗破龍頭寨及都蘭都蓬密西大
 支馬羅擒酋阿茲等其天漂天壩黎從楊保苗坪諸
 寨悉聽招撫復業者三千八百餘戶斬首一千五百
 七十九級通撫苗衆三百七十五寨捷聞下璽書獎
 諭賞賚有差

安莊女苗撒得爲土舍林天仲妻不相能嘗捨得足。纏曰此非苗家法裂之衆中得怒甚值富蠱倡亂得。乃挾土兵三人牛四頭從富蠱圍平越蠱感之迎得。巨魯寨通得住三日許事成爲后會王驥征麓川歸。擒蠱并得解京師時香鑪山賊惟蠱與韋同烈最强。天仲憾妻得奔魯曾借同烈兵殺得不克至是得自。請于朝願爲香鑪山向導立功贖死值于謙奏遣國。初降番徙置河間東昌者令從征香鑪山勒留南中。以絕也先之應于是許得請第殺蠱而使得爲向導。帥降番行且指之曰苗女之美如是也以歆之得乃。

引保定伯梁瑤直擣同烈巢擒之而天仲戰死。正德十年金石番長官石承隆殺其兄承暹反守臣。擒之死獄中其年銅仁苗龍童保與鎮溪苗龍麻陽。篁子百夫長龍真糾衆爲亂都御史沈林湖廣都指。揮潘勳會兵征之連破領篁亞西亞保生擒童保麻。陽及其家口而釋其餘叛者。水西安氏者靄翠後也自奢香之死其弟安勻孫安。貴榮先後承襲故世稱安氏但驕蹇不受節制卽聽。調從征非邀重賞不赴且渺視官軍嘗睥睨省城曰。是直用水西氊衫疊塞耳正德中榮以從征香鑪山。

有功加貴州布政司叅政猶快快乃奏乞減龍塲諸
驛以償其功事下兵部議時兵部主事王守仁以建
言謫龍塲驛丞榮敬禮之守仁乃貽書責榮止其事
其略謂祖宗制度不宜擅改擅改者謂之變亂雖在
朝廷猶不可况其他乎夫使君之先亦何嘗有積功
累行可長斯土而自唐迄今世官不改亦曰有朝廷
法制在也今日驛可減則世官可革久矣且夫既爲
世官則爲朝廷剷除寇盜正守土常職而乃藉區區
征調用以邀賞則使君歷代恩寵將置何地况使君
得改叅政原非設官之舊今復干進不已萬一典銓

者曰向係土官故長有其地今叅政則流官矣東西
南北惟天子所使于是下方尺之檄委以他官或閩
或蜀誰敢勿行由此言之龍塲諸驛非使君所有也
榮得書悅然驛竟不減既而宋氏部羅叛徵榮兵不
至守仁復貽書責之竟至榮死子萬鍾襲萬鍾驕縱
甚于榮有漢民張紘土目烏掛導之惡每游獵酒酣
輒射人爲戲嘗撻夷民角藥抹鬼阿內抹蔥四人怨
之一日集督府督府未出候于外有賊刃萬鍾頭去
索賊不得既而稍稍知角藥四人四人逐時萬鍾無
子其三弟萬鎰宜襲鎰以賊未獲故辭謝間紘與烏

掛。遠。保。其。疎。族。普。者。冒。萬。鍾。弟。曰。萬。鈞。告。襲。指。揮。胡。未。遠。朱。蕃。祖。勲。前。後。承。勘。受。其。賄。匿。情。報。鎮。巡。等。官。謂。普。者。襲。是。但。普。者。幼。請。暫。委。鍾。妻。奢。播。攝。宣。慰。事。待。普。者。年。長。而。後。承。襲。于。是。萬。鎰。悔。辭。謝。使。人。說。烏。掛。不。聽。大。恨。乃。借。所。親。雲。南。女。土。官。奢。爵。兵。并。巴。兵。共。數。千。人。襲。烏。掛。烏。掛。覺。之。亦。募。兵。數。千。相。讎。殺。而。角。藥。抹。鬼。阿。內。三。人。適。在。境。為。亂。兵。所。斃。惟。抹。蔥。逃。免。烏。掛。因。誣。鎰。殺。兄。鎰。亦。誣。兄。為。掛。殺。疏。十。餘。上。下。鎮。巡。勘。驗。巡。按。胡。瓊。上。狀。言。萬。鎰。宜。襲。但。與。烏。掛。互。相。誣。訐。宜。各。治。罪。令。輸。贖。統。坐。遠。戍。蕃。勲。未。遠。奢。爵。俱。逮。問。梟。角。藥。等。首。捕。抹。蔥。而。罰。布。政。司。趙。文。奎。等。之。納。賂。者。鎰。乃。承。襲。收。嫂。奢。播。為。妻。仍。雄。諸。蠻。鎰。死。子。阿。寫。幼。嘉。靖。七。年。提。督。尚。書。伍。文。定。請。其。弟。萬。銓。攝。事。俟。阿。寫。長。承。襲。久。之。阿。寫。襲。銓。去。位。而。阿。寫。又。死。阿。寫。子。國。亨。幼。夷。民。仍。請。銓。視。事。俟。亨。長。承。襲。至。嘉。靖。四。十。一。年。亨。承。襲。銓。又。去。位。而。于。是。有。安。智。讎。殺。之。事。

西河合集

蕭山毛奇齡

字大可 稿

昂天翻狀上較
田得名銅卿

蠻司合誌 三

二 貴州

嘉靖元年貴州巡撫湯沐上治苗三議一預定土籍夫土籍不明則爭奪所由起也今土舍傳接應如軍職貼黃例各于歲終上其世系履歷及有無嗣子于布政使司司又上其籍于部而起送襲替可按藉定矣議一一嚴飭土學凡土舍應襲者年三十以下俱

飭入學習禮否則不許起送襲替其族屬子弟願入
學者聽凡一切補廩科貢與軍民武生一體則禮教
可行夷俗可變議二一清查軍伍請以五年為率通
計天下衛所軍士舊在新勾以科逼在逃者指揮以
下議罰都司叅問其清軍御史不第清坐勾軍丁且
兼理缺乏軍伍令所在有司各開報解發收伍名籍
于都布二司二司呈送清軍及巡按御史彼此叅証
則諸弊可革議三

三年鎮遠土推官楊載青以土舍襲職嘗中貴州鄉
試巡撫楊一漢請如武舉襲廢例加陞一級以為遠
人向學之勸吏部執不可謂土司額設原有定員且
俱已在任有何加陞但于本衛量加俸給著為例報
可

都勻部苗王阿向者屢據凱口固稱亂官司不能制
遂于十五年夏發兵攻平浪鎮巡官招之不下詔遣
巡撫陳克宅調土漢官兵三萬集固下固故絕險賊
復于要害設弩樓疊石防守攻三月不克乃先分兵
歷破賊黨凱酋等固隨招降附近諸苗至四十九寨
賊稍離散然後令土官安萬銓購壯士能獺拔者乘
夜雷雨以鐵鉤縛手足若指爪然攀崖援木以上然

後用輓梯鉤繩使眾軍魚貫躡絕頂發弩石下擊總兵楊仁等督各哨仰面夾攻之萬餘兵自山後馳下開國門遂斬阿向及賊黨十餘人凱口盡平是日斬首二百五十級俘獲四百招降夷寨男女二百餘口遠旋師既而賊復振先是阿向之祖世襲土官忽為平浪王仲武先人用計奪襲遂為世讎而阿向亦復與仲武爭印割地相攻殺于是有凱口之役乃凱口既平克宅議盡逐苗黨以其地屬都勻府召軍民佃種改前國曰滅苗鎮仲武因諸夷失業陰遣人招復旋科索之諸苗怨望私推阿向餘孽王聰王祐朱兔

等為主謀糾合黑苗與其黨攻據前國驅逐耕種軍民多所殺鹵鎮巡檄副使叅將守備等官分領土義兵進勦賊亦乘雨夜襲破守備鐵冠諸營生執叅將李宗祐指揮陳佐周鍾弁百戶軍舍等三十餘人詔革總兵官楊仁及前任巡撫陳克宅職停監軍副使陳則清兵備副使林茂仁俸褫指揮守備等官及鐵冠王遠周仁等四十人冠帶而下王仲武于獄既而巡按御史楊春芳遣官撫諭賊爭赴訴求還土田并復其官印乃願釋宗祐等謝罪而究無成說嘉靖十六年都御史汪珊仍調土官安萬銓都指揮朱文指

揮李木統土漢官兵三萬有奇集圍下萬銓親率花
 鎗手與賊相拒賊敗走渡河萬銓追之朱文等三面
 竝進因樹招降旗于道賊走旗下者五百餘人聰兔
 據險下矢石我兵殊死戰遂破其圍斬兔等聰冒雨
 潰圍出為萬銓部兵所執已而賊酋王祐等復入據
 圍隨執之賊平是役也前後斬首二百六十三級降
 苗寨一百五十俘獲賊黨男婦二萬餘口
 蜡爾山界辰州銅仁之間有篁子坪土官田與爵者
 以事繫辰州獄諸苗賂吏陰脫與爵歸藏蜡爾山久
 之與爵稍聚眾自大反恃土官勢遍淫諸苗婦且虐

諸苗之脫已者嘗至土兵隆反家呼其婦不至殺其
 求子猪罰之值隣人鰥阿留死或告與爵阿留有弟
 婦貌美弟死與阿留同洞居與爵遂奪阿留弟婦負
 以牛將入山隆反忽率眾遮與爵諸苗被虐者亦匈
 匈前與爵知不敵乃挾刃且戰且却會銅仁苗久通
 賦知府按通籍責見戶見戶且亡命知府乃責其土
 官償之于是平頭長官者懷印與所部諸苗奔逃至
 蜡爾遇與爵與爵遂附之合拒篁子苗共保蜡爾稱
 兵反官軍討之不能克鎮巡上其事上特就家起萬
 鏜為副都開府辰州命相機進勦鏜徵諸路土漢兵

討之仍不克去嘉靖二十五年湖廣巡撫姜儀言鎮
筭銅平諸苗皆互相結援而土官從征者復故爲陰
縱以牽掣之遂至蔓衍不可拔自今以後宜專責宣
慰彭蓋臣彭明輔指揮田應朝等督土兵同漢兵會
勦不克者治之以法如是則事可立辦上是之于是
遣侍郎張岳督諸路會勦責成土官之從征者遂破
蜡爾山斬其渠且以計擒貴州苗等并杖殺田應朝
而其亂始定田應朝者本土指揮使以田氏與興爵
同族鏗用爲巡捕使伺興爵反結興爵煽諸苗亂是
時鎮筭銅平及貴州諸苗龍許保吳黑苗等皆其所

陰結爲應援者至是杖殺之餘見湖陽麻陽苗誌
當萬銓之去位也有二子曰智曰信智出居織金阿
魏而信留事亨亨淫虐嘗暱吳瓊吳珂而通其妻若
姊絕愛幸令百姓謁瓊珂皆跪起叩頭如謁亨信諫
之惡信其旣以他事罰信馬信買珂馬進亨知爲珂
馬也復給珂信大怒嘗醉把劍呼卜麻必覺語曰吾
欲殺吳珂如何卜麻唯唯會夷目阿戶聞之以告亨
亨殺信信兄智馳告其姊夫未寧土吏奢效忠同稱
兵討亨會亨與母祿氏擊烏蒙土知府福榮榮本祿
氏姪曾與弟烏慮有郤祿氏呼烏慮來妻以所部女

實佐使慮借烏撒兵同擊榮而慮以出兵時淫所部
 路珠妻女為路珠所殺亨并留慮妻實佐使訟榮殺
 慮正會勘問而萬銓妻疏窮與土同知安國孝以殺
 信告且發其殺四峒人及烏慮事上遣給事與鎮巡
 官雜治之未行亨已與兄智及奢效忠戰于朶泥橋
 大開互相殺奪亨奪智及效忠所部阿祖罵雍沙那
 者抵者墮者頗褒遮班鳩阿宗而智及效忠亦奪亨
 所部勒普革普豆得劄果底威索務驢白非自水西
 谷里威清奢香陸廣金雞諸驛皆阻廢不通都御史
 阮文中御史鄭國仕等初議調諸路兵大勦亨亨自

知不法頗愆既而議夷俗讎殺縱稱兵第當就吏議
 曲直不宜煩我兵革遂遣宣慰宋一清約法令究殺
 信罪且獻諸主謀者亨大感立獻阿弟吳瓊吳彤務
 卒惡卒吳珂何高等復與前而後乃對簿伏殺信狀
 當死于是以三萬五千金自贖而以六千金贖務卒
 等事定亨與智俱去職令亨子安民行宣慰事智子
 國貞行夷目事亡何亨所部阿撒沙拱阿朋阿豆復
 以私憾殺智卒四人傷一十六人智復報殺仍具獄
 萬曆改元都御史蔡文都司高金宸麻哈守親詣木
 空河讞不決其明年秋都御史羅瑤下同知高任重

司理常正和雜讞復不決當是時智所主謀者吳鶴
 駕亨所主謀則吳阿軻吳阿箇也亨暱阿軻與阿箇
 甚于瓊與珂而阿軻與阿箇之妻若女其為亨所有
 與瓊珂等于是按察司林挺章直索阿軻阿箇與鶴
 駕同治罪且盡逐漢人之藏夷者而後使亨智對簿
 亨乃大懇請輸的都朶你及毛家可瓦大南王莊張
 三壩豆紅崖左王右王陂花蔡官梨兒鮮隴二十四
 寨與智和解終智世而後還亨其一切所訟俱置不
 問僅罰亨入穀千石智三百石贖罪軻箇以下皆輕
 重輸贖有差亨乃益感矢報効以湔前耻時賣羔堡

阿占界首阿崖阿散皆強賊阻山為寇亨悉擒捕膠
 致凡威清平壩之間道無伏莽又水西酋長者普犯
 十二營鹵土婦隴氏亨逮以獻兵備使余一龍為之
 奏問值水西有阿列之酋谷里有阿古之酋白歸之
 酋白縱之酋阿扯之酋威清有阿捕之酋奢香有沙
 遮之酋阿白之酋陸廣有阿列之酋阿虐之酋普也
 妻之酋金雞有阿遂之酋其久充諸驛驛騎馬匹皆
 前後散去亨急為舉廢驛騎盡復乃悉令夷酋辟地
 墾草勸農桑察贍貧者流夷自占而還者至一千三
 百一十八人于是四十八部酋長十二宗親一百二

十麻葉未則阿體等匍匐告都御史王緝請復亨冠帶許之至萬曆十二年復以他事議褫冠帶旋復其後女土官奢社輝與安邦彥合為亂印亨後苗坪天漂黑苗種也在湖貴川廣界與者亞鼎足居每入漢必道者亞顧為生苗前此未為漢所屬其俗男子蓬跣短衣而長禪女子則花裙銀鐲面深墨色獨多力好鬪萬曆六年天漂阿蓋等三十餘人詣長官金篆所願輸賦役為編氓請刻木立信都御史何起鳴下兵巡蘇愚問狀遣指揮郭懷恩及長官金篆同往而阻于者亞乃遠從丹彭間道通天漂會苗

坪黨銀等十餘人亦詣篆所同天漂所請皆以首亞閉關不得通時都御史王緝新赴官使使者簿責者亞酋阿斗謂斗故我屬何至梗道阻嚮化者斗叩頭服謂我等本平定部也為養善牌所誘因蹙去平定而歸養善今養善奴視我寧能從乎閉關所以拒之也今願往平定請以者亞定所屬因下吏議議屬之都勻獨都御史執不可謂平定孱弱無可藉其願往詐也此必有主謀其間者復下吏案驗吏乃呼阿斗密詢之果得實謂漢人天金貴及張受主謀教言往平定而陰實借諸蒙兵以襲養善乃治天金貴等罪

令者亞一十五寨仍屬養善牌如初而者亞路通于
是苗坪天漂皆請奉貢賦歲輸賦二十四兩天漂五
十七寨歲輸米一十二石貢馬二苗坪九十九寨歲
輸米二十四石貢馬四遂請符驗更冠服以華名名
其牌曰歸化隸都勻版籍凡使往自生齒以上悉跪
拜送使至平定夾騶從行前吹蘆笙杖鼓唱蠻地歌
呼道而馳事聞上嘉之各有賞賚令苗坪立都保一
人通事二人頭目十人寨長九十九人天漂立都保
一人通事一人頭目五人寨長五十七人而以指揮
一人軍二十人常從把總巡徼塞上曰將軍令毋匿

亡命毋動小忿敢不如令者斬越七年者亞阿斗反
伏誅乃復罷樂平吏曰加麻哈州判一人令居樂
平司而以養鵝者亞羊場落邦餘甕河樂戶西諸苗
皆屬焉

毛吳墜者永寧苗寨也其隣有長牛阿田者于隆慶
初曾出劫白鄧魯打罩廣三屯都指揮陶鼎持斧逐
捕之中流矢死而毛吳墜酋長光賽光見攻剽羅紹
華張斌匡廷鑾殺羅顯奇五人斌上變言賽見及弁
及長牛殺指揮事萬曆七年詔令都御史王緝御史
馬呈圖督兵進勦而緝與呈圖疑所上不實遣普安

永寧二知府按視長牛毛口諸寨覘變而光見知知
 府至負弩出郭迎叩頭願將軍幸哀憐吾小人死請
 輸貢賦比編戶氓庶及乃拘使對簿無實釋之而坐
 斌等誣罔律且以斌調永寧廷鑾調烏撒獄上初斌
 上變時謂賽見所居在五龍止京箭林間宮室輿服
 皆擬王者出入張黃蓋樹幡幟擊鼓號雲陽王大不
 道故廷命進勦而皆無有張斌嘆曰吾北行時有阿
 逃土目方仲八贈我百金為治裝以我能告見反也
 不如是吾何以對方土目哉
 貴陽苗寨有也香狗場與者亞通婚媾會長老頂宋

已歸附輸租賦有年顧貧甚歲比逋負不得償寨傍
 有高山以為險每漢使至輒走高山頂鼓譟罵使
 還報有司無如何于是稍稍輕漢使乃陰集亡命劫
 人奪金帛久之遂至反十一年都御史劉庠檄宣慰
 安國亨宋懋德統紅兵勦之生擒老頂宋等九十人
 梟以徇曰敢亂者有如此刑

答于雞賈甲多皆都勻苗寨也都勻苗者亞阿斗反
 而答于寨阿其應之斗誅阿其以幸免乃累累犯寨
 十四年土舍吳楠王國聘慮阿其叵測禍及已請以
 答于雞賈甲多都定崖埋屬蒙詔立宣威營設把總

一人而以蒙詔佐之。凡答干一十三寨歲輸賦三十
九石。中間答干輪十石著爲令。阿其獨不伏。引者亞
殘苗圍宣威營。鼓譟曰：阿地誰令而營居中乎？蒙詔
常使使者阿邦老亂徵秋稅。阿其度使至先以血爨
門。令勿通。居常張繖鼓角。繪龍鳳什器。遂與雞賈甲
多阿賣胖同阿鳥斗。留鐵仰枯高閑亞仔阿場豹火
者真唐靠諸苗擊牛酒爲誓。稱兵劫歸化亭。長巡徼
至答干問狀。阿其出與戰。詈罵亭長去。官軍莫敢進。
獨山土吏蒙天眷請于都御史。願提兵進勦。而先使
間者詳言。漢已黜蒙詔。令以宣威營地還阿其。立阿

其酋長朝暮當撤兵去。阿其乃親馳樂邦牛場。謂往
來者言。言皆符弛備。天眷乃設伏左右。伺其間。驟入
斬阿其并阿賣鐵仰枯等一十六級。雞賈甲多皆歸
降。而于是屬蒙詔者自答干雞賈甲多外。又有塘蛙
當井斗坡甲樹蠟白磔馬崖埋等一十七寨。
小橋熟苗龍木恰曾賜冠帶。視寨事年老。請子俸替
值參議。給糗糧與俸。勿及恰恰奪之。俸愬諸參議下
守備逮恰恰。揮其屬龍黨蘇鎖漢使已而逐之。曰：走
此是我家事。如再來則我當以烏難諸寨殺汝反矣。
時參議秦舜翰頗立威聞。其語卽給籌與恰。而以計

擒之死獄中亡何龍化龍羊山引川苗攻孟漢焚其
 邑居已圍繞壩帶哨口漢無故殺苗苗請報之官軍
 戰不利既而都司蔡兆吉齋奉旗牌諭令降待以不
 死于是諸苗皆散去俸視事如故
 羅金寨生苗吳老天為諸苗雄長激浦張把高盧溪
 吳老虎下里楊武楊再興五寨黃牯牛水德苟朝隆
 苟朝祖等皆依之時陳策為將軍嘗捕盜得苟朝祖
 楊再興榜掠放去而阿酋下水有酋長龍老朋索老
 天逋錢掩至羅金寨擄張把高妻向氏及楊申兒等
 五人去老天贖之不肯與反鬻之他寨老天與黑潭

寨吳小老天遍索之稍聞申兒賣龍老求家為奴而
 向氏無有苟朝祖故惡將軍策謂將軍策實受賂縱
 苗匿鹵婦啖把高懇御史所而策疑吳小老天陰陽
 執小老天同至羅金寨呼老天質問老天怒即令吳
 老虎陽再興等殺策反都御史舒應龍勦捕之老天
 與黃牯牛苟朝隆走湖廣轉入大山崖匿錦朶山久
 之貴州副將陳天祐搜諸山設伏獲老天等梟之銅
 仁市

印水土舍楊光春行印水長官事而貪頭目彭必信
 為之箕歛民怨甚逃諸梁上巴野六甫鬼計諸苗寨

參議以上皆議請免春改土為流議未行春與必信
 單騎遍馳所部莊寨給言漢兵勦夷民當歛金贖夷
 民死凡三十六莊七十二寨合得金五百兩兩人分
 其金都御史何起鳴訶知之下都清道逮捕春繫獄
 痰死不及必信于是用漢經歷劉試到邛水營事立
 青頗茨瓦四哨每四戶擇壯兵一人邛水四百戶戶
 不下二百人出為兵凡不為兵者佐糗糧三斗魚鹽
 月人一觔有八兩皆廩食餘稅而簡土吏何文奎等
 掌四哨別選精兵五十二人立營居中裨將徐軻巡
 徼之未幾必信乃密誘諸苗謂新法不善不利苗請

與十五洞洞長約為我治裝我當愬之朝以復舊例
 洞長唯唯乃議每洞出裝銀三兩合得四十五兩走
 長安上書謂巴野梁上六甫鬼計諸寨酋長喬鵝苗
 女喬苗柴虎苗高良等數百人阻山為亂樹旗幟鼓
 角攻七十餘寨殺男婦五百人而指揮使陶啓忠不
 之問也反索土吏揭光春錢而殺之改舊例用新法
 欲求苗不反難矣書上不省然而必信意自得歸謁
 知府王一麟陽陽一麟叱縛之送司獄乃檄名諸苗
 以為必信所奏喬鵝事此在萬曆初孰與今日今日
 若等第不利漢吏耳乃假此為恢復計有國法在不

便思若等所患苦或以兵餉戶賦米三斗過甚府能
 為若等寬之故事本司歲給白虫舖米每洞月八斗
 凡一百五十石他于平溪驛剩餘徵二十二兩此皆
 可足餉今已後母苦諸洞諸洞皆叩頭稱便乃坐信
 誣妄而新法竟行

皮林苗吳國佐少入學為永從縣生員驕黠有大志
 居恒往來洪州草坪等寨相度形勢自謂皮林與九
 股接壤山川險奧可因之成大事於是帥皮林諸苗
 反始播發難時皮林嘗助逆至是播滅乃結聯他寨
 講營陣攻破永從縣燬城郭廬舍殺官吏劫獄囚而

去萬曆二十八年沅撫江鐸廉指揮李楷智勇請授
 楷勦事會楷征播還自謂當便道埽除不煩專兵其
 明年先遣他總兵進勦地險不得入且所遇潘老諸
 酋引眾萬餘盡為牛首陣當者多傷楷嘗探苗洞得
 其根株從叢菁中取道道僅八餘旁臨溪不測步騎
 相持如是者數十里且苗又斷溝畫塹布以竹簽楷
 所在填接使壯士鄉導逐步拔簽而後行乃先擣潘
 老寨奪其險隘遂進擊賴洞岑朝二寨斬酋楊滿金
 首生獲龍貴才吳寅龍諸渠膠致軍門轉攻六背山
 斬酋華海良萬等三十八級於是破洪州破草壇斬

獲首鹵及婦女牛羊無算乃進逼時洞時洞者國佐所據寨也然國佐已竄去楷乃分遣徧將由他洞襍入而自與遊擊董獻策沈弘猷當其險者曰其坤卽俗名銅關鐵寨破之而入窮追至赤沙至高茶生獲國佐及石纂大金董四吳海等斬首五百八十二級諸洞悉平捷聞上乃賜金幣獎厲自總兵官陳遴以下下水西安國亨子彊臣曾于萬曆中從討楊應龍有功及死無子而弟堯臣襲其職至堯臣又死子位幼妻奢社輝攝宣慰司事天啓元年永寧宣撫使奢崇明

反奢安本世姻而社輝又奢氏女其明年土目安邦彥說社輝起兵應崇明社輝然之遂通烏撒土酋安効良合四十八部頭目安邦俊魯連安若山陳其愚陳萬典等殺都司楊明廷于畢節戍知州郭俊義于陸涼州境叅將尹啓易自烏撒奔回霑益會霑益土婦設科合安効良拒戰殺守備李加培周嘉映貴陽大震先是水西未反烏撒衛指揮管良相覘事有變與巡撫李樸曰奢安久脣齒奢反安必繼之烏撒孤城與水西相雋良相隻身無子當以死報國明庭奈何圖長策保障此一方民乎樸咨嗟而泣良相亦泣

至是邦彥破烏撒良相自殺然後遣賊宋萬化截據龍里而自提兵圍貴州時城中兵少糧久匱樵與巡按史永安悉力禦之賊四面攻擊造雲梯滾廂矢以必拔鎮將張方彥將兵二萬赴援隔龍里不得近既而廷命新撫王三善進勦三善忠勇止平越平越兵萬人副將徐時逢將之戰兔城不利叅將范仲仁坐視遂大敗殺前鋒馬一龍等而軍士皆退三善急召諸將曰事迫矣前則以戰死後則以法死夫死法與死戰孰優尚何待也乃命諸道何天麟楊世賞各將兵從他道進而自將二萬當賊鋒一日抵新添又一

日進毋猶洞又一日次新安是夜報賊至合營驚擾議退兵三善手劍疾呼曰退卽死此旣而覘無賊乃命劉超爲前部超三善同里人有智略疾行抵龍頭營三善身尾之相去不二里聞砲聲衆懼不欲前三善督之旣而劉超捷音至初超兵遇賊却超下馬斬却者二人而自揮刀斷賊標時賊首阿成驍甚超與部兵張良俊直前斬其首賊披靡會大兵至齊進奪龍里賊復大集乃大戰却之遂據龍里城衆議休息三善曰我兵猝至賊無備此可以破竹而顧却之何也遽策馬前進衆隨之自平越至此凡六日抵城下

而邦彥已遁。遂乘勝窮追至畢節。舖賊步騎如雲。皆自相蹂踐而追。騎如墻。竝進斬獲無算。安邦俊戰死。輜重山積。時城守十月。旦夕陷。忽賊兵奔潰如蟻。喊聲雷震。俄頃五騎衝鋒至城下。曰：新撫至矣。軍民大悅。慶更生。是時三善同將卒披氍單騎。冒矢石以二萬人破賊十萬。檜等迎入城。三善不許。曰：賊兵不遠軍心。猶未定也。我不可。即安遂營于南門外坡上。大雪。次日移營宅溪。賊遠遁。陸廣河外。三善遣人諭奢社輝母子。使縛邦彥降。不報。無何諸路兵至。三善既怒其後期。且憂乏食欲。因糧于敵。又諸軍視賊過易。

前鋒楊明楷出戰失利。陷賊中。三善收兵入城。既而邦彥復糾宋萬化等來攻。三善連戰于龍里。青巖。定番。八姑。蕩。屢捷擒宋萬化。諸蠻多降者。邦彥復退守陸廣鴨池。諸寨當是時川撫朱熒元破奢崇明兵窮蹙。投水西。邦彥復助兵合謀。一窺遵議。一窺永寧。三善乃統兵擣賊巢。擒土司何中尉等。進營紅崖。連破天台。水脚。婁石。牛酸。草諸囤。并大壩。洪鳥岡。賊所借烏芸等部苗望風奔潰。三善按轡直入大方。救出田景猷。楊明楷等。奢社輝焚大方老巢。挈子位竄火灼堡。邦彥竄織金。會川兵入龍場。擒奢崇明妻安氏及

其弟奢崇輝等奢社輝懼遣漢把劉光祚赴鎮遠乞
 降于總督楊述中而述中主撫與三善議不合遂授
 賊券狀勒擒獻邦彥崇明白贖時三善意三善謂楊督既
 彥亦令其黨陳其愚詐降窺三善意三善謂楊督既
 立撫局則勢難自異因受降而其愚大猾善伺三善
 喜怒三善信之遂被害時石砭女土官秦良玉與其
 弟民屏同受調從征而民屏亦死既而監軍御史傅
 宗龍獲陳其愚誅之于是水西烏撒永寧諸賊皆合
 兵向霑益副總兵袁善宣撫使沙源等破走之時水
 西苗老虎阿引殺奢崇明子奢寅來降無何安邦彥

復寇貴州燒劫麻姑孫官堡官軍敗績巡撫王城巡
 按傅宗龍遣都司張雲鵬等先攻河沙壩羅鬼并廣
 順定番青巖白納諸蠻以翦其羽翼然後拒邦彥于
 趙官堡敗之值朱燮元以艱歸而參將楊明輝諭安
 位為邦彥所殺崇禎元年起燮元五省總督討賊先
 是三善由陸廣入大方凡百七十里皆羅鬼巢窟前
 衝後截已失地利燮元初議滇兵出霑益遏安効良
 應援而別布天生橋尋甸等以絕其走蜀兵臨畢節
 扼其交通四裔之路而別出龍場巖後以奪其險黔
 兵由普定渡思臘河徑趨邦彥巢而陸廣鴨池擣其

虛粵西出泗城分兵策應。然後率大軍由遵義鼓行而前。尋以憂去。未及用。總督閔夢得繼之。亦以貴州抵大方路險。而賊惟恃畢節一路外通用。兵當自永寧始。由永寧而普市而摩泥而赤水百五十里。皆坦途。赤水有城郭可憑而守。宜結營于此。而漸進。漸迫。爲白巖爲層臺爲畢節。共二百里。至大方。然後以重兵扼之。可一鼓擒也。亦不果用。至是。熒元至。乃檄滇兵下烏撒。蜀兵出永寧。畢節扼各路要害。而親率大軍駐陸廣。以逼大方。時崇明號大梁王。邦彥號四裔大長老。其下反費阿鮮等各號元帥。悉力趨永寧。先

犯赤水。熒元授意守將許成名佯敗。引之深入。度賊已抵永寧。分遣林兆鼎從三岔入王國。慎從陸廣入。劉養鯤從遵義入。邦彥分兵四應。力不支。羅乾象復以奇兵繞出其背。急擊之。崇明邦彥皆被創。斬其首以獻。熒元騰檄安位。許其來歸。位惶恐不敢出。熒元督諸將屯據要害。四而迭攻。凡百目得首功萬級。生口數萬。每獲鄉導輒發窖粟就食。賊饑甚。遂降。乃與約四事。一貶爵。一削水外六目之地。一獻殺王巡撫者首。一開畢節位。俯首聽命。賊平。熒元乃條陳便宜九事。大抵謂不設府縣。置軍衛。不易其俗。土漢相安。

且訓農治兵永為折衝上皆許之越二年安位死無子朝議欲乘其弊郡縣之燮元上書諫乃止遂傳檄土目分其地以授渠長使力分易制乃復奏曰西南皆荒服也然楊氏反播奢氏反簡安氏反水西而雲南之定番止彈丸小州耳為長官司一十有七乃二三百年未間有反者非他司好逆而定番忠順也蓋地大者跋扈之資而勢弱者保世之策也時識者皆誦其言

西河合集

蕭山毛奇齡

字大可 桐

朱世昌伯屏較單之倫矣常較

蠻司合誌

四

四川

四川古西南夷國即漢冉駹邛夔笮都牂柯夜郎諸地故其地外雜氏羌而內盤羅獠磨屯烏合靡有定居在前朝小蕃大蕃實界松茂當全川西北屢為邊患而沈黎越巂建昌諸衛環繞蠻獠當全川西南其中烏羅闕昨交牙互齒最易啓釁洪武五年播州宣

慰使楊鑑來朝始置宣慰司令仍舊職而其旣龍州
土官薛文勝天全六番土官高英以次歸順仍使文
勝爲龍州知州高英爲天全六番招討司正招討是
時邛州六番招討使苟德本元世官明玉珍據川德
從明氏至是亦來朝貢馬乃稍降其職爲黎州長官
曲靖宣慰使祿哲亦元世官至是妻實卜與弟阿哥
亦來貢授卜烏撒女知府哥需益知州其餘乍降乍
叛茂州土官楊者七已授知州而以叛伏法于是稍
稍經理定播州宣慰司賦稅改永寧長官西陽宣慰
爲宣撫司置平茶邑板麻陽石耶洞四長官司而以

土酋爲長官置威州千戶所松潘等處安撫以龍州
知州薛文勝爲安撫使又置阿昔洞等十三族長官
及副長官會筠連州滕大寨蠻酋編張等叛命將袁
洪討平之而巴縣蠻王立保自稱應天大將軍燒佛
圖關犯通遠南絕二門播州江度蠻王安茂州土酋
董貼里龍州土官趙宗壽先後爲亂皆移兵勦除之
而立重慶衛并復威州千戶所及茂州衛指揮使司
互相鎮守時四川都司遣兵修灌縣橋梁至天陶關
汝川土酋孟道貴疑爲襲已集部落阻陶關道皆擊
勦無遺其他茶蠻洞獠眉縣賊彭普貴宋儂茶洞賊

田大蟲皆隨叛。隨滅。惟建昌衛指揮使月魯帖木兒并栢興州賈哈喇摩步等相繼稱亂。遣藍玉爲總兵擒月魯帖木兒父子獻俘。而哈喇未伏。會沔縣吏高福興土民田九成僧李普治謀叛。有何如順者號天王。大敗官軍。焚略陽縣。治殺知縣呂昌。執教諭呂銑去。復焚徽州。治殺學正顏叔彬。詔遣都督徐凱指揮黃中討哈喇長興侯耿炳文武定侯郭英討九成等。皆以次勦平。無遺孽。于是改播州安撫司爲播州宣慰使。領安撫司二。曰黃平。曰草塘。領長官司六。曰播州。曰餘慶。曰白泥。曰容山。曰真州。改設東川烏撒

烏蒙芒部四軍民府。而以黎州長官司爲安撫司。永寧長官司爲宣撫司。領長官司一。曰九姓。與平茶洞直隸長官司同隸布政使司。而別以酉陽石碛二宣撫司并邑梅洞長官司隸之。重慶衛泥溪平夷蠻夷沐川四長官司隸馬湖府。其都司領者則軍民千戶所。一曰龍州。招討使一曰天全。六番軍民指揮使司一曰松潘等處領長官司。十八曰隴水頭。曰靖州。曰岳希蓬。曰占藏。先結。簇。曰蠟。曰白馬路。簇。曰山洞。簇。曰阿昔洞。簇。曰北定。簇。曰麥。曰者多。簇。曰牟力結。簇。曰班班。簇。曰祈命。簇。曰勒都。簇。曰包藏。簇。

曰阿昔簇曰思曩兒簇守禦千戶所一曰疊溪此皆
 隸兵部武選司者土官則知府四人曰烏撒曰烏蒙
 曰芒部曰東川同知一人曰烏撒判官一人知事一
 人曰龍州把事一人曰馬湖巡檢八人曰信寧曰倂
 促溪曰麻刺村曰昭平堡曰寒冰曰寧戎曰明月曰
 三益驛丞七人曰溪龍曰阿用曰祿馬曰蠻夷曰白
 水曰太平曰瀘沽改流知府一人曰馬湖此皆隸吏
 部驗封司者乃設四川行都司領建昌等六衛而屬
 以昌州威龍普濟三長官司末樂初指揮丁龍杜福
 撫諭亞堅等十一寨生苗三十六戶已認輸黑鉛筒

布上以苗人叛服不常命悉隸西陽宣撫管轄而免
 其賦役四年置疊溪鬱郎二長官司令屬之疊溪守
 禦千戶所設吏目一人是時諸土官皆遣貢獨末寧
 宣撫使阿聶妻奢蘇親入貢乃增設赤水宣撫司隸
 末寧衛又設重安長官司令屬之播州宣慰而以張
 佛保為長官又設馬刺邛部二長官司隸行都司設
 八郎安撫司隸松潘衛又改西陽宣撫司之邑梅洞
 長官司隸重慶府大率烏蒙烏撒東川芒部以東皆
 烏蠻爨蠻土獠諸種其居多板屋椎髻披氍出入佩
 刀劍相見以去帽為禮男長將娶擊去左右齒以子

日貿易名所集地為鼠街其在播黎諸地稍慕華風
 婚姻以銅器毬刀弩矢為禮燕樂則擊銅羅鼓橫笛
 歌舞每博易不用錢漢以細絹茶布蕃以紅椒鹽馬
 宣德初麻兒匪簇去松潘七百里有利麻著八讓卜
 聚眾侵掠遮遏八郎安撫朝貢松潘衛指揮吳瑋招
 之讓卜向化使其兄子完卜入貢且言其地廣過于
 八郎請置宣撫以轄之上乃置麻兒匪安撫司以著
 八讓卜為安撫使既而龍州土官薛忠義請陞龍州
 為宣慰以鎮番戎不許時播州草塘安撫所屬穀撒
 等四十一寨蠻長作亂攻牛場乾溪等堡救撫之不

從遂勦平之因改龍州宣撫司隸布政司會烏蒙烏
 撒二土知府祿呢一作祿昭尼祿等爭地讎殺遣行人章

聰侯璉奉敕往諭而烏蒙讓地上甚獎賞無何茂州

岳希蓬長官司長官血只同與靖州隴木頭長官并

各寨羌民一百七十餘人奏言茂州僻處邊隅與松

潘疊溪生番接界累歲被害有知州陳敏在官能撫

卹人民制馭生蕃今敏以親喪去民失所請本官起

復以安邊境敕令復任乃增設阿用簇長官司隸松

潘衛

先是威茂二州南路生番多夾居十五關堡隔河阻

山蟠踞爲患國初丁玉討定立衛祇就中通路一綫
爲中國所有其他如鐵鑪溝走石坡鴛鴦橋石花鞋
奮子灣木驢溝掃冰巖三哨嘴楊廣墩砲腦溝老虎
石翟貴哨石窩墩關門石陡溝子大小橫梁溝沙灣
龍溝秦王箭鏹刀灣掃水巖凉水井黃沙壩索橋頭
五哨溝乾溝黃土坎野猫壩石門坎亂石窖石蛇兒
狗子嘴龍打溝洞子溝沙灣麻答嘴諸處東路如天
花石三岔溝乾溝子琵琶頂谷驢兒溝高哨子旋風
巖險頭哨高子哨出龍洞母猪洞落魂橋月兒巖山
葱溝高哨子大灣松杯子擦耳巖鬪老巖弔巖子龍

黎兒溝高橋雞公嶺大沙灣臘菜坪諸處北路如寡
石巖虹橋關絕塞墩鐵門墩銅柱墩八呷口林燦口
恰乍口惡柘口寒盼口了裕口麻盼口唐弄敵貢壩
栢木橋東勝墩諸處俱番姓出入路也來則逼官道
行劫去則阻河而居諸衛饋餉多被剽截雖歲增防
兵不能捕宣德初大征安南當調松潘軍而衆皆憚
行千戶錢宏奸黠計惟蠻亂可免調乃與其黨尚清
入番寨捕番番大恚番長阿用等號衆出掠殺指揮
陳傑上切責三司官械宏入京誅宏命都指揮僉事
韓整以三千人勦捕而蠻五萬人圍松潘城焚上下

四關威茂諸衛皆被圍都指揮僉事蔣貴同松潘指揮吳璋急招之皆不從乃勅都督同知陳懷等會兵四萬人自洮河取路進而蠻方攻圍疊溪指揮吳玉等遇之失利韓整兵亦敗內臣令番僧失刺藏上等至諸族寨慰諭兼賜布幣番長結弟言我向化四十餘年未嘗敢亂而錢宏陳傑無故統官軍啊喝索生口捕男女大小而取吾礪錢是豈吾歸懷意哉今朝廷宥我罪賚我敢不惟命遂令結弟遍諭生熟番十一族占藏卜九族黑水生番二族皆納款去蔣貴遠止陝西官軍令勿進時尚書蹇義以龍州勢輕請陞

龍州軍民所爲宣慰不許乃改龍州爲宣撫隸布政司已而諸蠻復出掠破綿竹縣仍劫威茂二州官軍戰不利鎮撫侯璉等死之遂勅都督陳懷及方政蔣貴進兵乃合陝西貴州兵六萬餘人錦衣指揮何敏等四人督戰蠻方攻筠連巡檢吳瓘出家財募兵守城大兵至合擊破走之乃擣官軍及土兵分道進政以精銳五千人擊其西北大寨破之貴督兵七千破任昌大寨而都督指揮趙營分道各進兵以次討平龍溪三十七寨前後斬首一千七百餘級墜崖赴水死者無算餘悉撫定因增松潘衛前千戶所茂州衛

前後二千戶所且增置潘幹寨阿角寨芒兒者三長
官司隸松潘衛諸蠻惕息不敢出巡按御史王翺上
便宜五事其一謂松潘近邊去省城八百餘里番寇
爲害都督陳懷居省城緩急未便雖委官領軍難盡
約束當令懷往彼鎮守以壓邊境其二謂松潘威茂
諸衛所官軍月糧皆成都諸府州縣所運多被劫掠
若令暫于成都諸府州縣等衛倉收貯農隙之際類
集諸有糧者人齊力起運而都司撥軍護之且令布
政司委官交量則道路無虞而收受亦無弊上曰善
遂敕陳懷往鎮松潘正統四年以王翺代懷著威惠

番酋商巴等感悅盡率諸部受約束入貢者接踵景
泰初諸蠻竝起撫臣羅綺檄悔罪不聽乃招募材武
得禪師智中牌頭尤弄柯皆豪健各統精銳乘夜銜
枚分道搗賊巢綺介胄隨之破撲爬諸寨擒劇賊卓
勞阿兒結十餘人戮之既定治以簡易暇卽與番人
接杯酒歡番人畏慕終綺任不敢叛成化中諸蠻大
劫掠叅將請增兵巡撫夏垣曰將不在兵兵不在衆
乃揀精銳四千八百人往更之而一無所增時黑虎
寨最强相傳有神術先知官兵未至卽遁去或潛伏
要害竊發屢敗我衆按察使襲鏊獨曰我自不密耳

彼何能知夜半密勒諸將統兵進凡三十里平明抵其寨蠻大驚潰斬縛各千人得其首惡餘潰死無算既而大征破寨二十餘斬五百級降者數千皆編籍輸糧副使東思忠于大石佛嘴鑿山開路人皆便之乃復遍勦惡匪平山諸寨斬首百餘級萬曆中復大征人荒沒舌丟骨三寨南路盡平時自威茂達松潘從小阿三舍漳臘官道兩傍修築邊牆傍護諸往來堵禦竊發一時稱便其後牆稍圯隨時補葺議者謂南路後山自雄溪西寧以達蒲江北定抵鎮平界倚山爲磧築城設敵樓而鎖兩頭以重關且復增舊牆

聯絡相接以防番寇則輪班戍軍可以盡革歲省軍餉可數千萬其周遭屯種歲之所入亦不下數百萬而其說不用

山都掌蠻在叙州西偏介川貴間與永寧芒部烏撒相接諸峰盤互大壩爲門戶其東則進爲凌霄又進爲九絲旁峙都都寨舊稱九姓後以蠻族莽維改九絲所在結寨無慮千百族宋熙寧間蠻叛用白芳子兵破之因作誓蠻文稱民壯爲白芳子國初諸蠻皆出降入籍輸賦分山都六鄉水都四鄉皆隸之戎縣而水都平衍逋逃無所匿獨山都冥奧不可窮詰故

但稱山都掌蠻宣德初蠻叛官軍討平之正統中復
 叛時西北用兵不暇及至景泰元年都御史李匡御
 史劉幹始議討以疫作不前天順中都督許貴再討
 不能勝撫諭而返至成化改元猖甚川貴撫臣各奏
 蠻分劫州縣遂命川撫江浩貴撫李浩總兵官芮成
 副李安徽原調官軍刻期會勦時翰林侍讀周洪謨
 謂蠻各有主請擇蠻人有望者立為長官司隸之本
 府統各寨夷民而漢民則統之戎縣流官使各有分
 屬則夷情自定而副總兵李安復請委永寧宣慰奢
 貴赴大壩令諸夷就宣慰管轄議莫能決國子學錄

黃明善獨昌言曰夷漢分屬不無近理信如安奏則
 奢貴平日所轄土獠羿蠻尚不能鈐束以致攻燒屯
 堡殺掠軍士其能撫都掌之眾哉命下總兵官審處
 而芮成等已先進兵劄西華等鄉分道擊殺遂破賊
 寨斬六百餘級會貴州兵至竝集全鵝池合攻大壩
 并遣指揮孫泰督芒部土兵截賊後路永寧土兵守
 落敖山口賊不能支乃遣阿圭等三十七人詐降軍
 門思倉卒生變以圖內應成驟擒之阿圭袖小刀左
 右擊刺無所用乃燒賊三十七寨斬賊首五百八十
 七級報捷甫還師賊復出掠值給事中秦崇御史吳

編勘軍政卽遣崇等會川貴兵敗賊小峰堽青岡坎
諸處斬賊首四百七十餘級復還師敘功芮成李浩
秦崇等皆次第陞賞而賊以次年召諸蠻阻山大寇
乃決計大征襄城伯李瑾爲總兵官程信爲兵部尚
書督軍往討信至永寧分大軍三道四川軍由戎縣
貴州軍由芒部雲南軍由普市水腦竝入期共會大
壩而自督兵入金鵝池時南寧伯毛寧亦至爲左哨
敗賊李子關伐木開道官軍發神鎗勁弩乘風縱火
焚龍背豹尾七百五十一寨米倉三千八百一十一
所斬首一千六百餘級生擒三百四十人進至大壩

攻山都六鄉焚一千四百五十七寨米倉九百八十
一所斬首三千十七級生擒九百五十三人獲銅鼓
六十三面牛馬猪羊盔甲鏢弩牌刀旗幟弓箭無算
餘賊遁山箐者皆搜勦無贖願降者聽有匿天井水
磨諸洞者下令遍塞諸洞門而環以兵月餘死洞中
臭達十餘里官軍爲謠曰洞勿關有臭蠻乃并平九
姓土獠之附賊者遷瀘州衛於渡船舖增置江門水
流崖洞掃處關堡改大壩爲太平州設長官司分故
都掌地隸永寧芒部加信兼大理卿進瑾築爲侯餘
各頒賞有差

播州漢牂柯郡也唐改郎州既又改播州楊氏世有其地元世祖授楊邦憲為宣慰使賜其子漢英名賽因不花封播國公國初楊鑑內附使仍為宣慰改隸四川領黃平草塘二安撫真播白泥餘慶重安容山六長官司統七姓為田張袁盧譚羅吳而田張取大世為目把永樂初楊昇奏所轄當科篤雍等十一寨蠻人梗化不服上命昇討之宣德中楊欽正統中楊炯楊綱皆世修職事獨綱子輝傑黠多豪舉天順初私闖土民黃保等為火者嘗嬖妾田氏以其所生子美居長屢欲奪嫡安撫宋韜長官毛釗執不可曰楊

氏家法立嗣以嫡不以長獨奈何素之輝不得已乃立嫡因名庶曰友名嫡曰愛言相友愛也然而嬖庶之心終不忘倖客張淵說輝曰主官欲貴孟主而唧唧與伸主為讎毋論勢有所未便即使奪伸以與孟不過剽吾左以益吾右耳且重貽口實以滋後議何不別為孟主地雙貴而朋立是使孟創業而伸傳世也輝曰為之奈何淵曰天霸諸苗主官部境也山箐險遠慙而易虐誣之曰賊因請兵討之然後歸功孟主而請立安撫以治其地誰曰不然輝大喜乃立召容山長官韓瑄重安長官張通告以生苗反狀使止

變瑄爭之謂苗實不友輝怒杖瑄通惶恐叩頭曰友
 友請從輝署名上變上命都御史張瓚同輝進勦殺
 諸苗千人輝乃賂瓚疏友功且曰友謀勇冠軍手刃
 七馘時友甫十三歲乃請設安撫于安寧授友安撫
 使而以張淵為長官然友實未嘗之官也安撫紀錄
 彙編作宜撫
 既而爛土諸苗賚果等忿天霸以無辜受戮時時
 攻安寧瓚又疏請于凱里寨築城衛之費糧數十萬
 成化十九年輝死愛修怨于淵淵屢謀殺愛不克二
 十二年丹章諸苗寇安寧四川叅政謝士元副使翟
 廷蕙都指揮楊綱以兵往過播州詣愛家置酒高會

翼日視學適州民賽社士元等坐學宮臨觀愛復攜
 酒至訓導楊禮炮然曰視學而觀社提兵而樂酒略
 等威而歛下屬竊為明公耻之士元等大慚而起時
 淵伺愛隙謂愛實通苗越境為亂故歛官軍逗遛修
 私怨為文報貴州守臣而致書舉人路義使之通路
 值安撫宋韜獲其書以示愛愛乃易其書遣使投義
 義信之遂詣貴撫陳楊愛友狀貴撫不聽且曰播非
 我轄也義為書復友而愛執之愛遂據義書報川撫
 將聲罪發難友大懼淵嗾友上變言愛結苗夷反叛
 造火器旗纛金瓜鉞斧調總旗等號親軍閹割土民

立金龍門于宅前而開尚甕等鐵冶令偽閹官煉熟鐵爲軍刀置織造院收民人趙其一百餘戶充織匠造龍鳳蟒袍立商稅局于白田壩起調軍兵三千餘衆假水西送喪演習武藝設教坊司以偽閹官掌其事鹵良家龐兆期女勝真福真等一百餘名充女樂教習襍劇每遇節旦愛衣龍衣自稱國主天主而稱其妻地主且置後宮奪趙高僧幼女玉真爲宮妃用巫師魘魅庶母貫氏禁父妾馬真蔣真等宮中姦使有身嘗強淫宮婢宋真不從裸之縛于杙牽羣狗導之淫凌辱狼藉而後殺之科派各里人民分上中下

三戶得金銀若干萬兩養老莊田子粒若干萬石珊瑚樹若干株珍珠簾若干絰玉圭若干笏馬若干匹牛若干頭嘗夢騎龍登天門上帝謂之曰此南方帝子也旣醒龍成五色因作詩有霹靂一聲震天下南方須起赤鱗龍之句廷議大駭立命刑部侍郎何喬新錦衣衛指揮劉綱會川撫及巡按鞫之俱不實淵坐妖言律路義削籍友論死贖免發保寧城中羈管未幾友黨纂友歸與愛讎殺不已且糾衆攻播州焚愛居第及公私廨宇略盡廷臣方請討會大征鄢藍兵不暇及未幾友卒廷議謂逋友雖死子弘尚存當

仍調兵食以彰國法而川撫勘奏謂弘父友構亂法
 固難宥但友構亂時弘尚幼穉似當開自新之路與
 以更始况友所焚殺已經始土例折償及還所侵奪
 于官宜授弘冠帶土舍而其既愛死子斌豪甚舊制
 土官有功祇賜子衣帶及旌賞部下人員無陞職加
 銜者斌以平普安蠻功于正德初加四川按察使銜
 賜蟒衣玉帶弘忌之仍起讎殺及弘卒重安土舍馮
 綸等又以怨弘誘諸苗攻安寧貴撫鄒文盛反命斌
 討平之而請復安寧安撫令弘子弟得襲舊職廷議
 不許嘉靖六年弘弟張復以為請時張盜邊劫得白

泥司印信復與斌子相重相讎殺較前更烈守臣乞
 改凱里屬貴州以張為主知州以解釋之事久不決
 初廷議謂楊張習父兄之惡幸免于辜輒放肆然執
 印以要君且其所爭田莊及椎埋殺人等罪尚未得
 決正宜收置于理令其悔過還印償所奪寨苗諸地
 而驟議復職未便其後用兵部尚書胡世寧議謂張
 黨已成若不因而撫之恐流禍無已乃復張凱里安
 撫屬治貴州而相則襲播宣慰如故然其讎殺仍自
 若也諺云骨肉鸚膾參商播凱

西河合集

蕭山毛奇齡

字僧開 又名性稿

陶賓仲玉較 蔡文子開

蠻司合誌

五

四川

正德二年鎮監羅箒奏威茂所轄十南村曲山等寨
自弘治四年叛後不服征徭者十七年矣至是來歸
乞為白人請衣巾願納糧差白人者其俗以白為善
以黑為惡也

嘉靖二年馬湖土巡檢安宇自言從征年久累獲首

功奏乞改註職官兵部覆宇本土知府安鰲之子法當安置廣西因四川用兵暫留行間雖有功例應給賞而宇故辭之陰爲開復土官之地則先朝岑猛岑濬事可取鑒也上然言遂不許

先是楊斌子相襲播宣慰職以祖父嫡庶讎殺訟禍數世至今不已相不之鑒仍寵庶子煦欲奪嫡烈而其妻張氏甚悍與子烈盜兵逐相相走水西死烈乃乞水西還父屍播故有水烟天旺地與水西近水西宣慰安萬銓屢挾奏不可得至是要之必歸地而後予屍烈陽許之及得屍悔約讎殺相攻剽垂十年總

督侍郎馮岳討平之岳乃奏三省接壤民苗之衝若四川餘慶之走馬坪播州之三度關貴州石阡之龍泉司各立哨堡於重慶偏橋等衛委指揮三人督兵防守仍移銅仁叅將于石阡移思石守備于龍泉控扼播州令犬牙相制而後設重慶府通判一人使之駐龍泉以收糧稅則控馭較便也上然其言

靜州長官司土舍節貴以叛見誅并亡印信其弟車勻請襲職部議謂叛人子孫法當廢革但車勻頗著忠勤宜特與承襲統攝羌苗仍照例納穀五千石免其赴京報可

天旺落六寨土女酥卽孳產牝牡而獸尾衆以爲女
與畜交故有此三度關守者白之總督馮岳將訊之
岳曰蠻族本穴居巢卧人獸相襍此卽槃瓠馬人之
故習也何怪焉遂救壞所產而置女不問
芒部土官隴慰死其子隴壽與隴政支祿爭立朝命
以嫡故立壽而隴政支祿倚烏撒土舍安寧等數爲
亂且稱兵向壽壽亦借水西兵相牴牾而政竟殺壽
收壽印川撫王軌與御史劉黻上其事黻言宜順從
夷情以立支祿而軌言隴政支祿同以犯公殺朝廷
命吏罪不赦詔遣叅將何卿督勦之斬支祿并賊黨

二百餘級俘二十餘人降者數百而政奔烏撒卿令
土舍安寧及土婦奢勿擒政以獻安寧初許諾旣而
出獻阿核阿達屍云政無有久之傳政死兵部議奏
芒部隴氏釁起蕭牆騷動兩省王師大舉始克蕩平
今其本屬親支已盡無人承襲請改芒部軍民府爲
鎮雄府設流官知府統之分屬夷良母響落角利之
地爲懷德歸化威信安靜四長官司使隴氏疏屬阿
濟白壽祖保阿萬四人統之其朝貢馬匹如程番府
例以重慶通判程洸陞試知府松潘叅將何卿兼提
督守其地許之旣而夷目沙保謀復立土官隴氏遂

挾衆叛攻鎮雄府城陷之執試知府程洸而奪其新
印殺數十百人洸奔畢節川貴守臣急遣使招撫沙
保已送出鎮雄府印乞降然尚持兩端欲復立土官
如故上遣川撫王廷相同何卿提兵進勦土官阿濟
稱沙保已殺死廷相據聞而芒部諸夷復挾沙保子
普奴爲亂聲言壽有子隴勝在河濟處隴氏實未絕
請復土官而使隴勝襲其職官軍與戰于畢節不利
旣而御史施山總兵牛桓且稱沙保亦不死阿濟言
不實敕行提督尚書伍文定同鎮巡官搜捕沙保并
擒獻普奴而兵部尚書李承勛復以文定專主用兵

爲非計詔文定回京于是或勦或撫相持不決者數
年川撫唐鳳儀新任仍敕勦捕且專責阿濟使之擒
沙保斬于軍門乃奏言烏蒙烏撒東川三土官故與
芒部爲唇齒自芒部改流官諸夷懷不平反者數起
今懷德長官阿濟等雖自詭擒賊而其復土官而存
隴氏之心實未嘗忘也臣請如宣德中復安南故事
俯順夷情則不假兵力禍源永塞時川按戴金貴按
陳講奏與同而兵部尚書胡世寧覆言革流官而復
隴氏未便夫芒部自成弘以來數自讎殺斯時未設
流官也今隴政以爭襲誅死隴壽又死而隴勝方幼

諸夷皆云非隴氏子故前都御史王軌不得已奏設
流官知府分四長官司各統其衆制非不善徒以軌
等遷去知府程洸迂暗不能拊循故芒部復亂今諸
夷輒易其詞云願復隴氏夫壽政皆隴慰親子猶相
爭殺二十餘年今勝非真壽子也一旦得立使阿濟
得弄諸股掌其他三長官司所統各寨萬一不平而
各尋一隴姓者求立守臣能爭之乎若謂烏蒙諸土
官咸懷不平而芒部上人終憚流官約束則請諭鎮
巡以仍設土官之意然後收芒部舊印與鎮雄新印
敕四長官司及各寨頭目能守法奉職三歲不爲亂

者聽巡屬布政司不復制以府治或立土官知府及
流官統轄者皆隨所願其隴勝令布政司驕留教育
俟別處改用無何戴金奏芒部夷穴不可守宜俯順
夷情以立土官而唐鳳儀等奏勝實隴壽真子蓋私
通長官阿濟妄奢卽所生者夷俗重骨脉衆所嚮服
宜量授府佐令統束四長官司仍選流官經歷如舊
三年之後果能率職奉貢始准復舊銜其鎮雄之名
不必更改四長官司亦照新設詔從其言後復敕威
清兵備仍還安莊添設兵備一員于貴州住劄畢節
專制畢節赤水永寧烏撒諸處而增防守官軍八百

名于各站所事平掣去其戍畢節者則量從貴州撥入統之兵備作防禦焉

嘉靖二十五年白草番為亂陷平番堡及奠酒關鹵指揮使丘仁殺百戶耿爵等朝議罷川撫王大用副將高岡鳳而以都御史張時徹都督何卿代之時徹乃議分石泉壩底龍州兵為三哨復調天全招討使高繼光馬湖長官王祥鑾等率土兵獾猓及建昌諸衛兵助之生擒首惡黑殺李保白石兒白石撒刺等斬首七百級俘男女二百七十七人燬碉房四千八百七十餘牛馬器械儲積以萬計

山都掌蠻有凌霄九絲都都諸寨凌霄者阿苟之所據也苟之先在天順成化間謀不軌兵部尚書程信襄城伯李瑾討平之其後有阿其嘗為盜未敗嘉靖間以從征賜冠帶即苟父也苟有壻阿辱大事紀與作阿孰其黨阿歪么兒阿繆皆桀驁多膂力至是重以為可恃遂衣蟒衣張蓋策駟馬所至用鼓吹響呼夾道而馳萬曆二年都御史曾省吾御史孫代聞于朝下兵部議先是兵部尚書譚綸曾撫川奏都蠻為患其來已久今遺孽復熾當先練關隘游兵以備不測乃募浙人製鳥銃者銃發口啞而死者數人蠻甚憚之至

是綸請征救省吾及總兵劉顯進勦至大壩僅獲其
酋長阿果梟斬之然苟益不平乃流殺長寧諸處椎
埋坑儒生剝剔孕婦其時有羅氏女冬兒被執不可
辱則支解而挂之樹間都御史責劉顯觀望且慮諸
蠻多效尤相繼起乃調永寧宣撫奢效忠與水西土
舍安國亨各以萬人至同指揮守備據險從三路入
而副使李江參議沈伯龍轉漕軍中會武舉人李之
實與阿苟善同知洪一貫使爲間誘執之乃乘勢轉
戰連獲阿辱阿奢等斬首二百級檻阿苟獻軍前苟
仰首笑曰么兒在雖執我何益哉么兒苟義兒多力

者也顯乃設伏馬草坡襲落豹惡淚坎寨然後向凌
霄攀藤援木而上都蠻皆走獨么兒以滾木壘石當
我軍我軍稍却步兵鄭龍奮而前曰諸軍弟望我火
箭火箭舉則齊發而入于是各貫弓挾矢目逆龍龍
忽燃火箭直衝蠻鋒諸軍萬弩進蠻盡墮旣前執么
兒并胡大漢等九十五人斬二百餘級焚死無算阿
苟聞么兒被擒哭曰九絲不復守矣其後餘黨據他
寨者盡爲劉顯等所滅于是有都都寨九絲之戰
都都寨寨王名阿墨與九絲蠻同據險稱亂方諸軍
擊凌霄時卽欲勦九絲而都御史獨決筴謂先攻都

都。可。斷。九。絲。左。臂。也。是。時。鎮。雄。土。舍。隴。清。親。帥。三。千。
 軍。軍。藍。澱。坡。用。火。攻。都。都。而。總。兵。郭。成。吳。鯨。等。亦。舉。
 火。燒。董。布。壩。及。紅。崖。逼。寨。寨。中。鼓。譟。出。四。走。會。雷。雨。
 火。熄。蠻。復。聚。大。兵。乃。迎。諸。蠻。戰。諸。蠻。皆。殊。死。不。可。敗。
 翼。日。顯。與。成。各。分。兵。二。路。攀。崖。仰。攻。而。印。壩。諸。苗。千。
 餘。來。援。顯。回。擊。却。之。乃。督。鎮。雄。酉。陽。諸。土。兵。更。番。入。
 斬。蠻。王。四。首。則。阿。墨。在。焉。乃。大。搜。諸。寨。生。獲。阿。歐。阿。
 當。阿。瓦。阿。掛。等。鹵。茶。穀。金。鼓。梭。槍。無。算。而。九。絲。乃。大。
 恐。九。絲。之。蠻。以。萬。數。阿。大。阿。二。方。三。其。著。者。也。當。是。時。

阿。大。阻。雞。冠。嶺。而。阿。二。方。三。嬰。九。絲。城。壁。壘。相。望。乃。
 以。凌。霄。都。都。相。繼。滅。震。懼。思。詐。降。以。覘。虛。實。會。長。寧。
 諸。生。王。希。忠。琪。縣。監。生。何。鉅。有。機。智。請。入。賊。川。問。乃。
 令。二。人。持。銀。牌。綺。幣。往。撫。而。阿。大。大。喜。遽。隨。二。人。出。
 徒。跣。叩。軍。門。請。得。備。編。戶。不。敢。反。都。御。史。初。疑。之。必。
 得。阿。二。方。三。來。始。受。降。既。而。予。冠。帶。趨。受。約。束。使。捕。
 阿。二。等。自。贖。阿。大。乃。遁。去。顧。其。勢。與。九。絲。隔。陰。為。聲。
 援。將。伺。我。師。走。隩。中。則。翼。而。覆。之。諸。將。詞。實。戒。勿。進。
 然。同。時。諸。蠻。若。雞。冠。黃。土。內。官。母。猪。弔。猴。崖。得。居。印。
 靶。諸。寨。則。實。以。阿。大。降。故。皆。先。後。歸。順。九。絲。由。此。勢。

大孤先是副使李江司轉餉遙從萬山中逆舟而上。中有趨本二灘亂石縱橫水勢直下若建瓴長年循高崖牽引多死至派僧夫數千人猶不足營山青神二主簿相繼道斃成都知府陳大壯鳩工鑿二灘值梅雨暴漲督工巡檢曾本死於水相顧嘆惜至是諸蠻降諸軍多因糧于賊省轉餉乃遣劉顯為大將佐以郭成劉綆冉維屏奢效忠等將入都都寨而先從深溝楊柳坡印靶窆口穀爆以扼其險期日請決戰不勝乃簿責效忠隴濤等謂前以一萬騎三日破凌霄五日破都都寨今合兵五萬騎而連月不克一九

絲何哉效忠發憤提翼兵夜半陰襲隘詰旦為重陽日我師方就蠻飽食將登高望而蠻俗以是日賽神天大霧晝晦度我師不能至皆盡醉鼾睡諜者得其狀會暴雨夜半傳發胃雨入攀絙而上未明斬守關者蠻大驚自殘殺蹈藉我師益衝擊之遂大潰追獲阿大于雞冠寨斬阿二方三千夜郎大盤之間先後下寨柵六十有奇斬首捕鹵得四千六百餘人酋長十人獲銅鼓為誦葛鼓九十三面他若牛羊諸物不可勝計時阿大見銅鼓跪而泣為大將軍言曰是鼓有神凡鼓體剝蝕而聲磳磳者上鼓也可易牛千頭

體澤而聲。聲者次鼓也。可易八百頭蠻人得上鼓。二三面可以王矣。當吾與師時，擊鼓高山，諸蠻聞山頭鼓聲，纂纂來椎牛而饗之。而後出行劫劫，勝則復椎牛祭鼓，以為神。今可得乎？初戎縣以都蠻得名。至是更名曰興文。賜驛名曰都寧，倉名曰恒裕，并易九絲曰恒蠻，凌霄曰拱極，都都曰都定，印靶曰文印，鈞猴曰降蠻，雞冠曰金雞。且又通內官寨道，置總兵僉事以鎮臨之。隸以府同知一人，守禦千戶所一人。傀儡為印部羌寨，有亡命趙永成者，與土人葵咱咱五十呷聚眾將為亂。會竹麻寨攘七執鎮西軍陳黑

子者而強買其婦黑子，欲贖之。七不從，羌俗貿易必遷居。貨至鎮西號為趕集，黑子度是時七必贏錢。至則執七索還婦，乃約宗人陳禮保捕七七，覺跳身走，追至羊圈河禮保，彀弓射諸羌。中羌人龍扒死，七引諸羌案黑子無故殺龍扒，當抵擁至傀儡寨。值葵咱咱方舉兵至，是號眾曰：漢兵將滅我果至矣。鳴鼓登城門，從鎮西站縱火燒官廨百戶。魏繼武持印走殺而奪之時，王廷瞻為巡撫，聞于朝且讓守備丘紹先令戴罪勦捕。而五十呷賈千叭寇曬經關道路不通。于是副使景承芳統指揮王選及丘紹先軍竹麻

有裨將李獻忠者獲鴛哥別于鬼皮果寨讞之非鴛哥別即亡命趙末成曩時自鬻于五十呷者也五十呷喪未成如矢首目而諸軍破廳經關擣宰猓轉戰二日諸羌助之張高岡上大小冲三尖三梭各以兵至官軍用鳥銃連擊連勝于是諸羌皆乘船浮江官軍追北至江上矢發如雨湛其船羌兵溺水死水為不流旦日乘勝復擊之諸羌大敗先是邛部長官嶺柏死有妾沙氏與嶺應昇爭掌印舉火延燒利濟站而官不之問以故宰猓鐵洗姑都遂焚八里鎮蠻平堡一無所忌今咱呷等燬官解殺百戶弄兵與官軍

轉戰而聽其遁逃渠魁未殄何以服蠻眾兵部督勦捕甚急王選丘紹先皆按部不動未幾裨將劉經忽奏記都御史曰傀厦宰猓洗馬竹麻諸寨已捕縛葵咱呷那一加脚那加賈別冬谷兒短褚張田保鎖那加等若干人且獻褚那呷執散喇呷傀鮓枯撒脚脚乞等首級詣軍門叩頭請賞死於是都御史以聞斬咱呷等鎮西市而諸羌盡服

南路四十八寨惟丟骨人荒沒舌寂大兵備一作王詔巡邊至三寨三寨度詔至必道崖下乃竝伏伺詔過擊詔墜馬死副使林應節乘傳道沒舌沒舌人掠

應節賞裝臨行褫其衣萬曆元年寇安化關明年寇歸化關又明年擊斷我糧道邀奪松潘諸轉運軍食故事歲正朔撫賞諸夷遣判官賚銀幣堂堂道三寨至是劫賞殺官吏黃申等四人于是御史撫前事奏遣指揮曹希彬徐承業裨將易鶴陽勦之殊死戰斬酋長白臉兒而三寨俱起希彬承業乃統諸軍軍楊廣墩木瓜坪羅鍋嶺諸處十道竝發先破人荒寨盡焚其窯房礮房兩寨見火舉鼓譟自相騰踐然後官軍竝乘之賊大潰死者甚衆其明年正月復賞羌會他寨媯媯兒子川盼匿三寨導甲仲牛兒等陰入城

以爲耳目賞羌者覺其姦乃搜得四人殺之當是時西有呷竹諸羌東有林洞諸羌爲四十八寨其外喇麻番衆耳阿舍思熱浪牢熱等皆同時請降三寨盡平惟疊溪諸羌爲梗跡及白草番議用兵然已久斷輿梁逃黃頭山後拒絕羌衆不與通石泉令強勉往諭其酋納麻舌皆降且嚴除三寨需索陋例曰新班錢熱衣錢架梁錢躡草錢放狗錢掛綵錢斷酒錢而其後白草復叛

白草風村野猪窩諸寨在武宗朝曾率白若羅打鼓寇霸底指揮使何卿討平之其後嘉靖中陷平蕃是

時卿已爲都督都御史張時徹奏請仍拜卿爲大將軍捕斬黑殺白石噉喇等于是風村一十七寨並匍匐介肉掛兒寨餓柘詣軍門請降願獻馬羊及腦包哈喇弓矢番刀等物都御史王廷瞻許之方刻木盟去亡何他寨若番牌大刀孫子皆請歸降效風村故事且得通道大印龍州期日詣軍門兵備使使石泉令李茂元受之羌俗囚首無冠茂元具漢冠易其名姓書冠間屈日啟軍門鐃吹數部攬樹鼓大鉦令諸羌魚鱗入諸羌聞鼓鉦望見漢冠及朱杆彩旗乃大喜舉足盤跳舞驩呼震天乃出漢冠冠諸羌諸羌跪

起各互視其首踊躍東西走既而又跪捧其首以謝乃言願歲輸黃蠟一觔元日長至赴縣庭朝賀寨樹一白幟削木祝皇帝萬歲編戶得二千四百四十男子四千二百五十六女四千一百三十八事聞加賞賚其後楊柳羌寇普安傍近白草風村及小河木瓜之間頗聞白草導穀粟寨反有據都御史徐元太遽請兵擊之白草絕穀粟往來自訴歲寨貢黃蠟一觔賦菽糧二斗如故今請益菽一斗示不反是時周嘉謨爲安綿兵備遣龍安知府按驗降冊實得壩底堡白草河西風村顛轉架孫兒掛馬鹿坪桃桃紅椒蘭

子龍流其指萬壽無疆
海鏡等二十八卷并新
編戶部例

